

海外叢書
馮自由著

華僑革命史話上

海外出版社發行

海外叢書

馮自由著

華僑革命史話上

海外出版社發行

目次

上編 興中會時期

- 檀香山興中會(1) 香港輔仁文社(3) 香港興中會(3) 橫濱興中會(1) 南非
洲興中會(5) 橫濱兩俱樂部(6) 橫濱文經商店(7) 台灣興中會(8) 橫濱華
僑學校(8) 橫濱中和堂(8) 香港中國日報(10) 橫濱開智錄(11) 橫濱廣東獨
立協會(12) 橫濱支那亡國紀念會(12) 香港和記棧(13) 香港世界公益報(13) 越
南河內興中會(11) 檀香山興中會之復興與隆記報(14) 美洲洪門致公總堂(15) 舊
金山興中會(16) 舊金山大同日報(17) 南洋中和堂(18) 香港廣東日報(19) 新加
坡圖南日報(20) 香港有所謂報(20)

下編 同盟會時期

- 緬甸仰光新報(22) 香港同盟會(23) 新加坡南洋總匯報(25) 暹羅華萃新報及同盟
會(26) 新加坡同盟會(27) 越南西貢堤岸同盟會(28) 香港東方日報(29) 檀香
山民生日報(29) 檀香山自由新報(29) 英屬七洲府同盟會(30) 香港少年日報(31)
雲高華華英日報(32) 新加坡中興日報(32) 新加坡三大書報社(33) 越南河內同盟
會(34) 緬甸仰光同盟會(35) 仰光光華報及進化報全輔公報(37) 南洋荷屬同盟會(39)
香港時事畫報(40) 美國同盟會(41) 檀香山同盟會(44) 新加坡星洲晨報(45) 加拿
大致公堂及大漢日報(45) 加拿大同盟會(47) 香港金利源藥材行(49) 舊金山少年

中國晨報(50) 菲律賓同盟會及公理報(51) 澳洲警東新報及民國報(51) 香港支那
報(52) 祕魯國利馬埠民醒報(54) 新加坡南僑日報(54) 美洲洪門籌餉局(55) 南
洋及美洲之歸國參政代表(59)

華僑革命史話

馮自由著

上編 興中會時期

中華民國之肇建，以海外華僑協助之力為最鉅，自孫中山先生甲午年（民國前十八年）首創興中會，以迄辛亥革命成功，幾無一役不倚賴華僑之資助。近人有警語云：無華僑即無革命，誠確論也。余幼居日本橫濱，十四歲即以父命訂盟於興中會，二十二歲充任香港中國日報及美洲大同日報駐東記者。二十五歲充任香港中國日報社長兼同盟分會會長，與海外各埠革命團體及主要黨員均有密切之關係。就中經過無數之毀家紓難及變產從公之種種大小事實，忠義壯烈，可歌可泣，表而出之，大足以康頑立懦，而振作國人抗敵衛國之勇氣。爰舉所知，編列為上下二冊，上冊敘述團體，而學校書報社報館商店等屬之，下冊敘述個人，謹分別記載如次。

檀香山興中會

檀香山為興中會最初之發源地，亦為總理幼時之讀書所，甲午年（民國前十八年）秋間，中日二國以朝鮮東學黨事件勢將構衅，時局緊張。總理因至天津上書直督李鴻章，條陳改革，為鴻章所拒，知滿清政府積弊重重，無可救藥，非澈底改造，決不足以救亡，遂於是歲秋冬間自上海重遊檀島，擬向舊日親友集資回國，大舉革命。總理少在檀島耶穌教學校肄業，同學及故舊至衆，其兄德彰（原名眉）字壽屏，為威夷茂宜島大苦牧家，交遊甚廣。總理蒞檀後，先赴茂宜牧場就商於乃兄，德彰首贊成之，且割撥財產一部為助，更致書檀島親友為之先容。其時華僑風氣尙極閉塞，聞總

理有作亂謀反言論，咸謂足以破家滅族，雖親戚故舊亦多掩耳驚走。經總理多方遊說，奔走月餘，僅得同志數十人，冬十月間假卑涉銀行華經理何寬宅開第一次會，總理爲主席，蒞會者有何寬李昌鄧松蔭（後易名蔭南）鄧金黃亮黃華恢鍾木賢劉祥劉壽鍾宇曹采李多馬李祿劉卓程蔚南許直臣卓海宋居仁陳南鄭照夏百子李杞侯艾泉林鑑泉等二十餘人，即由總理提議定名爲興中會，并草撰章程十條，規定以振興中華挽救危局爲宗旨，衆皆贊成。旋公舉永和泰號司理劉祥及何寬爲正副主席，永和泰號司賬黃華恢爲管庫，程蔚南許直臣爲正副文案。李昌鄧蔭南李多馬李祿黃亮鄧金等爲值理，章程內載每會員須繳會底五元，另設銀會，集股舉辦公家事業，每股科銀十元，成功後收回本利百元，文中尙不敢明言籌餉起兵字樣，以免會員有所戒懼，蓋其時華僑尙多不說故鄉黨慕思想，惴惴於公使領事之藉辭搆陷也。會畢總理復令各會員填寫盟書，一一舉手向天宣誓，如儀而散。其後陸續加盟者有楊納等九十餘人。是月二十七日（陽歷十一月二十四日）開始收取會員會底及銀會股銀，經十數日總數所得美金千數百元。總理以事機日迫，急於返國，而所集寥寥之數，殊不敷大舉之用。爲是焦燥異常，德彰聞之，乃更以每頭六七元之價，賤售其牛牲一部，以充義餉，鄧蔭南亦盡變賣其商店農場，表示一去不返之決心，總理計算所得約合港幣一萬三千元，遂於十二月初東裝歸香港，同志先後回國參加義舉者，有鄧蔭南宋居仁夏百子陳南李杞侯艾泉等數人，是爲乙未（民國前十七年）九月廣州首次倡義之導火線。惟檀島各黨員實力多不充厚，或經營小商店，或開設小農場，於總理歸國後，即不能有所接濟。總理於乙未秋廣州失敗後，是冬重赴檀計劃籌款再舉，諸同志皆無以應之，故總理不得已乃有美洲之行。

香港輔仁文社

輔仁文社者，香港僑商有志者所組織之小俱樂部也。成立於民國前二十二年庚寅（一八九〇），

其時去中法甲申（民國前二十八年）之役未遠，國人漸知滿清政府之不足恃，及研究新學之必要。港僑中遂有福建海澄縣人楊飛鴻（字衝雲）廣東開平人謝讚泰（字康如）二人聯絡有志者劉燕賓陳芬黃國瑜羅文玉胡幹之周昭岳等十六人發起輔仁文社以開通民智討論時事為宗旨，是為港僑設立新學團體之先河。其開會地點，最初假劉燕賓所辦之炳記船務公司為之，至壬辰年（民國前二十年）二月十五日始明設會所于百子第一號二樓，此社內容僅在多購置新學書報以開通民智，尚未含有政治上之激烈性質，然是時風氣仍極閉塞，聞者愈以洋化二字譏之。且時不免香港警吏之親伺也。衝雲為人仁厚和藹，行俠好義，尤富於愛國思想，嘗任香港灣仔國家書院教員及招商輪船公司港局書記長等職。時充任沙宜洋行船務副經理，於壬辰年始漸與總理相識，一見如故，時為總理在雅麗士醫學校最後修業之一年，故該校時有衝雲之足跡。及乙未正月總理自檳島歸抵香港，謀擴中會之組織，親訪衝雲，約其合作，衝雲欣然從之，輔仁文社社員加入中會者，衝雲以外，尚有謝讚泰周昭岳等數人。

香港興中會

乙未正月初旬 孫總理自檀香山返抵香港，即召華舊友陸皓東鄧士良陳少白楊鶴齡尤列諸人，擬聯合各地同志擴大興中會之組織，以利行進，因素知輔仁文社社員楊衝雲謝讚泰等平日宗旨相同，遂與接洽組織事件，衝雲等欣然贊成，港僑於初期陸續加入者，尚有黃永襄周昭岳歐鳳城余育之徐善亭朱貴全丘四等數十人，籌備既竣，即於是月下旬租定中環士丹頓街門牌十三號為總會所，榜其名曰乾亨行，旋於二十七日開成立大會，會名仍稱興中會，凡入會者須一律舉手向天宣誓，其誓詞曰：「驅除鞑虜，恢復中華，創立合衆政府，倘有貳心，神明鑒察」。會所成立後，衆議決定在廣州剋期大舉，推定 總理駐廣州專任軍事，鄧士良陸皓東鄧蔭南陳少白等佐之，衝雲駐香港專任後方接應及財政事

務，謝讚泰黃詠襄等佐之。二月二十日復議決挑選健兒三千人，由港乘船至廣州起事之策略，時時東提議用青天白日旗以代滿洲之黃龍旗，亦於是日通過。由是總理遂於廣州發起農學會以爲進行機關。粵垣官紳列名贊助者數十人，故無人疑爲挾有危險性質者，是秋七月各方運動將次成熟。衆以乾亨行漸有暗探窺伺，遂於是月二十八日撤消之。八月二十二日衆以發難在即，始投票選舉主席，名之曰伯理應天德，此職即起事後之合衆政府大總統也。時會中分孫楊兩派，衢雲要求此席甚力。總理不欲因此惹起黨內糾紛，表示退讓，力諫士良少白等勿與競爭。結果此席爲衢雲所得。九月重陽之役既敗，事詳余著『中華民國開國革命史』不贅，香港大本營全體瓦解。至己亥（民國前十三年）冬總理自日本派陳少白至港，發刊中國日報爲興中會宣傳機關。十二月湘人畢永年與哥老會龍頭李雲彪楊鴻鈞張堯卿辜天佑等有聯合各省秘密會黨一舉總理爲大首領之議，衢雲聞之，乃向衆辭興中會主席一職。並荐總理自代，未幾興中三合哥老三會各派代表在港開會，同舉總理爲總會長，并特製總會長印章，由日人宮崎寅藏齎往橫濱，上諸總理。庚子（民國前十二年）夏秋間，興中會復策劃廣州惠州之軍事，因之黨務亦大形進步。及八九月間鄭士良鄧蔭南史堅如等相繼失敗，衢雲且被清吏派人暗殺，興中會元氣大傷。黨務殆陷於完全停頓，祇餘中國日報尙能發揮正論，日向清廷及保皇黨徒作堅苦之奮鬥而已。

橫濱興中會

橫濱華僑在甲午冬孫總理自檀島返香港過境時，已與之發生關係，蓋總理於船泊橫濱期間，曾在舟中向歸國僑胞演講遂滿救國，爲該埠傳物行商陳清所聞，陳以報告僑商馮鏡如馮紫珊譚發等。馮等即派陳重登該輪，邀總理登陸商談國事。總理謂該船開行在即，不便登陸，授陳以興中會章

程及討滿檄文一大束，令轉交馮等照章設立分會，且謂廣州不日起義，陳若有意參加，可到香港投效等語。馮等得陳歸報，遂召集少數同志為組織之預備。乙未九月廣州之役既敗，總理偕陳少白鄒士良二人，亡命至橫濱，首訪鏡如于山下町五十三番文經活版所，文經為經營外國文具及印刷業之商店，馮氏開設三十餘年，在僑商中藉藉有名者也。孫馮相見，有同舊識，遂由鏡如約其弟紫珊及譚發（奮初）梁遠卿黎炳垣（煥輝）趙明樂趙峯琴溫遇貴等十餘人，在文經號二樓會商組織興中會事，衆舉鏡如為會長，趙明樂為司庫，趙峯琴為書記，紫珊炳垣譚發等為幹事，半月後復設會所於山上町一百七十五番，繼續加入者尚有溫芬（炳臣）鄭曉初陳才陳和黃焯文陳植垣馮懋龍（後易名自由）等十餘人，以懋龍為年齡最少，時僅十四歲耳。是時旅日華僑尚多目革命排滿為大逆不道，故會員咸有戒心，每次開會通知書，皆不欲假手于日本下女，概由小會員馮懋龍分別派送。冬十一月，總理決意遠遊美洲，擬向華僑籌集巨資，為捲土重來之計，因向各同志商借五百元充旅費，詎各同志多以有心無力對。趙明樂且辭退司庫一職，鏡如紫珊兄弟二人乃合籌五百元以應之。總理乃以此款百元供少白斷髮改裝之需。另以百元給鄒士良，使回港收拾餘衆，以備再舉。然後隻身再渡檀島。迨總理離東後數日，少白乃遷寓文經商店，佐鏡如編輯華英字典，已而各會員供給月費者漸少，鏡如少白等以經費無着，乃將會所取消，凡有會務均假文經商店二樓開會決之。越三年戊辰（民國前十四年）春，總理自歐洲東歸，時會員屢屢，黨勢毫無進展。先是丁酉（民國十五年）秋間，僑商鄒汝馨馮鏡如等大集會于中華會館，建議設立中西學校，以教育華僑子弟，公請興中會推舉校長，陳少白特荐上海時務報主筆梁啟超任之。時康有為以啟超有事不能兼顧，改荐徐勤承乏，并代改校名曰大同學校。徐勤既至橫濱，為康黨培植勢力，所聘教員皆屬康門徒侶，大都出身科舉，長於文學，其交際手段遠在革命黨之上。故自大同學校成立之後，興中會勢力日漸衰退，會員中能宗旨一貫歷久不變者，寥寥數人而已。

南非洲興中會

楊衢雲于乙未重陽廣州一役失敗之後，即漫遊越南及南洋羣島、印度、南非洲各地，曾在南非洲之約翰尼士堡及彼德馬尼士堡兩埠設立興中分會，得同志黎民占霍汝丁王熾王進陳妹何熾馬子方馬康何益江均何禧梁伯佳等數十人，經衢雲熱烈宣傳，會務頗形發達。丙申十月，衢雲揚言將回國起義，衆僑金助之，民占且賤售其商店事業從行。及至香港，衢雲以港地不能立足，遂之橫濱，以教授英文自贖。民占居港日久，旅費告竭，竟鬱鬱以終。嗣後南非黨員皆寂然無聞，獨有約翰尼士堡埠黨員霍汝丁（字勝剛）於民初返國，曾投資于李箕所創辦之江南福羣實業公司。後數年，復開設萃文書莊於香港荷理活道六十號，專經營書籍文具事業，該店至今猶存，南非洲興中會史事，獨此一人知之。

橫濱兩俱樂部

當橫濱興中會成立之年，該埠華僑工商界有兩小俱樂部，與興中會略有關係，一名三餘軒，乃商人馮鏡如馮紫珊盧桂園黎炳垣梁達卿等數人所組織，會員僅十餘人，孫總理陳少白楊衢雲等居東時，每晚恒至軒中聚談，或瀏覽書報，此爲僑商團體中之比較開通者。丁酉年秋，橫濱華僑發起募捐建立學校以教育子弟，即由三數人在三餘軒閒談中決定者也。一名修竹寄廬，會員數十人，多屬商店及洋行職員，其主要人爲梁麒生（文經商店書記）關谷馨（某洋行買辦）溫芬（某洋行職員）梁樹南（某英人飯店買辦）等，分子雖較複雜，但服務洋行者多豪爽，放言高論，毫無拘束，故總理等尤樂與親暱。戊戌年春楊衢雲自南非洲抵日本，未幾，總理從倫敦東歸，以衢雲於乙未九月廣州一役貽誤機要致敗，特約至某密所面責其罪，衢雲俯首無辭。當日所約會之某密所，即修竹寄廬也。其後梁麒生等返粵，每過香港時，陳少白常招待之。

橫濱文經商店

文經商店又名文經活版所，開設于橫濱山下町五十三番地，專營外國文具及印刷事業。在乙未十月總理蒞日時已開設三十餘年，店爲廣東南海人馮鏡如所創立，鏡如誕生地在香港，故有英名曰「Fung's」。二「譯音曰經寒爾，實由鏡如之「鏡」字粵音轉變而成，在英文本無意義，惟分析解之，則爲售王，似可解作出售帝王之義，外人過者見其門首高懸經寒爾公司之金字大招牌，引爲奇特，多注目觀之。鏡如祖先在粵世業儒醫，至其父展揚，始在香港，改業懋遷，旋以結識太平天國駐港將士回粵策動軍事，被清吏以「紅頭賊」罪案逮捕下南海縣獄年餘，卒瘦死獄中，鏡如自是抱恨終天，隻身東渡求活。生平疏財仗義，排難解紛，頗得僑衆信仰。甲午中日構衅，清廷喪師辱國，鏡如憤憤填膺，毅然剪除髮辮以示決絕。時旅日華僑無去滯者，有之自鏡如始，故華僑咸以「無髮仔」稱之。是年冬總理自檀香山返國，船過橫濱時，向同舟華僑演講逐滿救國，鏡如據售物商陳清報告，即派陳轉請總理登陸共商國事，總理謂舟行在即，無暇赴會，即交陳與中會章程一大束，使馮等在日設會進行。乙未九月廣州一役失敗之後，總理亡命日本，首訪鏡如于文經商店，即以此爲因緣也。嗣與中分會成立，總理攜來宣傳品二種，一爲揚州十日記，末附中可法及多爾袞二人往還書札，一爲原君原臣篇，即黃梨洲著明夷待訪錄之選本，均由文經商店代印萬卷，分送海外各埠。及總理赴檀，陳少白乃移寓文經二樓，助鏡如編輯華英字典，即三十年前盛行海內外之馮鏡如華英大字典是也。及戊戌年大同學校成立，鏡如爲協理，屢約總理陳少白楊衢雲梁啓超韓文舉徐勤諸在文經二樓密商兩黨合作救國問題，頗具端倪，以康有爲從中作梗而止。鏡如每引爲憾事。辛丑年留東京學生沈翔雲戡元承泰力山王寵惠馮自由等發刊國民報于東京，時日人對於留學界出版品取締頗嚴，故發起人欲得外商保護，藉免檢查。鏡如長香港，掛名英商，故由馮自由商取乃父鏡如同意即以「經寒爾」名義登記爲國民報之編輯兼發行人。國民報爲留學界提倡革命之第一種刊物。文經商店更爲橫濱與中會之出生地，是皆不可以不紀。（馮自由按文經商店亦爲筆者呱呱之出生地）是店于甲辰年（民國八年）遭祝融之劫歇業。

台灣興中會

興中會會員楊鶴齡有族弟名心如者，亦興中會會員也。乙未九月廣州失敗後，即赴台灣台北謀生，充任台北永樂町美時洋行買辦。陳少白于丁酉年（民國前十五年）至台灣訪之，遂結識僑商容祿年吳文秀趙滿潮等數人，共同組織興中分會，惟因會員不多，未設會所，即以心如居宅充之。其後此地會員對於祖國無所表見，心如于民國後，留滯台灣多年，從未返國，鄉人亦多莫知其消息。

橫濱華僑學校

橫濱華僑所設大同學校，自為康梁黨徒包辦後，因專用粵語教授，及強迫耶穌教徒子弟向孔子像拜跪，埠中三江幫商人及耶穌教徒羣起反對，遂有江浙派之郭外峯，耶穌教之趙明趙樂峰琴李卓生關國義，中和堂之崔美徒楊少佳廖翼朋，中立派之鮑偉昭盧榮彬諸人，集資另創華僑學校，以為之抗。董事長為華俄道勝銀行買辦郭外峯，而趙峰琴廖翼朋二人副之。是校成立於戊戌年（民國前十四年）秋冬間，前後所延教員有廖雲翔（卓菴）楊計伯廷繼（少偉）胡毅生梁新武（博君）陸瀛雲諸人，雖非革命黨所組織，然其發起人及教員頗與革命黨有直接間接之關係，橫濱華僑子弟不致全受保皇邪說所蠱惑者，賴有此耳。

橫濱中和堂

中和堂者，橫濱華僑工界所組織之小俱樂部也。地點設在山下町唐人街之一角二樓，最初并無名稱，形式簡陋頑固，彷彿一普通之海員來往棲宿所，即俗所謂行船館者，堂中設關羽神像，每值神誕

及節令等日，會員恒大會歡飲，歌唱粵曲，鑼鼓喧天，徹夜不休。其創立時期遠在丙申丁酉間，（民國前十五六年）與革命黨人初無何等關係，戊戌年（民國前十四年）夏與中會員尤列蒞日本，其人素以聯絡工界見長，遂設法與該團體主持人鮑唐楊少佳陳澤景等接近親暱。鮑等以尤善於辭令，頗禮重之。尤乃為該團體定名曰忠和堂，並使訂閱上海香港日報數份以開通之，是為中和堂立名之始。是年冬，橫濱華僑各界以康梁黨徒藉大同學校名義，侵佔中華會館公產，羣起反對，忠和堂亦為反對派有力團體之一。是時大同學校校長徐勤方大倡孔教，藉口該堂崇祀關羽，謾為迷信神權之下流社會，該堂中人尤為憤激，惟以內部缺乏文士，指導乏人，特請與中會員陳少白為顧問，代計劃與革事宜，少白謂忠和二字之意義，不如中和之切當，為易名曰中和堂，並使撤去關羽神像，破除迷信，以便耶穌教徒之加入，衆欣然從之。未幾，耶穌教徒翟美徒等十餘人，次第加入該堂為會員，翟為德國某洋行書記，兼英文夜校教員，與少白為舊交，次年衆舉翟為會長，而堂務乃日漸進展。辛丑年（民國前十一年）春留日學界所設勵志會舉行陽歷元旦紀念，管延華僑團體及外國名人蒞會。到者有日本進步黨首領犬養毅，菲律賓獨立軍代表彭西及中和堂代表尤列翟美徒二人，是日會拍照紀念，今尚有入保全此項照片也（按保全人即著者）。該堂自成立日以迄民國初年，仍是普通俱樂部性質，與興中會及同盟會並無密切關係。不過堂內任事人與革命黨員時相接近，有賴于革命黨員之指導耳。民國二年及六年北京政府舉行華僑參議員之選舉，該堂嘗用中和書報社名義先後派夏重民為選舉代表，其會員亦多列籍國民黨。至民十二年日本慘遭地震巨災，華僑財產損失過半，該堂自是一蹶不起。

香港中國日報

中國日報為革命黨組織言論機關之元祖，孫總理于己亥年（民國前十三年）秋間始派同志陳少白至香港籌辦進行，所有機器鉛字，概由總理在橫濱購運。至是年十二月下旬乃告出版，其社址設

于士丹利街二十四號，少白自任社長，初期助理筆政者，有洪孝充陸伯周楊肖歐陳春生黃魯逸諸人，初以不審英人對華政策所在，未敢公然大倡革命挑滿之說。半載後措辭始漸激烈，從前各地中文報紙排印俱用長行直行，獨中國日報首仿日本報式作橫行短行，令讀者耳目爲之一新。此報除日刊外兼出十日刊一種，定名中國旬報，附以鼓吹錄，專以遊戲文章歌謠諷刺時政，是爲吾國報紙設置諧文歌謠之濫觴。庚子（民國前十一年）與中會迭謀策勸廣州惠州軍事，其大本營即設于報社三樓，黨人出入給繹不絕。及是歲閏八月惠州三州田一軍敗挫，報社財政亦形不支，賴同志富商李紀堂源源供應，得免歇業。辛丑壬寅癸卯甲辰（民國前八年至十一年）之四年，人心漸趨革命，報務日形發達，是時先後主持筆政者，復有鄭貫公陳詩仲黃世仲馮自由王軍演盧少岐丁雨宸梁襄武何次甫何雅選盧信應平子諸人，國內外各地報館之高唱民族主義，與中國報相呼應者，亦縉紛並起。惟報社度支至癸卯年夏，竟無法撐持，不得已合併于著名文具印刷店之文裕堂有限公司，得以暫維現狀。新公司設總經理三人，少白與李紀堂容星橋分任之，星橋亦與中會會員也。乙巳年（民國前七年）秋同盟會成立，總理派馮自由自日回港，佐少白辦理黨務報務，同盟分會亦附設報館社長室。丙午年（民國前六年）秋文裕堂營業虧折，淪於破產，中國報以連帶關係，亦遭連同拍賣之厄，幸事前馮自由約同志李紀堂李煜堂數人，集資預向文裕堂承購報社全部產業，始不致爲保皇黨人所攘奪。是歲八月，中國報改組，同時遷至上環德輔道三百〇一號，衆舉馮自由繼任社長兼同盟分會會長，自後數年報務黨務，均具長足之進步。關於西南各省之軍務，如丁未（民國前五年）四月潮州黃崗之役，及同月惠州七女湖之役，五月廣州劉思復之謀炸李準，九月惠州汕尾運械之役等等，皆由同盟分會發動之，此外如欽廉鎮南關河口諸役莫不由中國報報道消息，故此報實不啻爲全國革命黨人之總樞紐，其銷數之多寡，與人心之趨向革命與否爲正比例焉。己酉（民國前三年）冬同盟會南方支部成立，漸與香港劃分會分權限，自後關於軍務及香港以外之黨務，由南方處理之。未幾遂有庚戌（民國前二年）新正廣州新軍反正之一役，是

役既敗，民黨元氣大傷，中國報原屬商辦性質，馮自由以羅掘俱窮，無力再辦，乃請南方支部特撥公款維持後，自赴加拿大就雲高華埠大漢日報之聘，南方支部於是改派李以衡司理，謝英伯張錫軒等爲編輯。自癸卯後文裕堂合併時代，至丙午後馮自由經理時代之七年間，中國報資本概由同志商人負擔。及庚戌二月以後，始由南方支部派人經理，支應浩繁，不勝其擾。至辛亥（民國前一年）春，適有留美黨員李其歸國，支部乃以中國報司理一席畀之。是歲五月檀香山黨員盧信黃時初等願集僑資負責接辦中國日報，支部許之，及九月粵省光復，報社遷于廣州。至民二年八月龍濟光入寇，遂被封禁停版。要之中國報歷史可區別爲三期，從己亥至乙巳之七年爲陳少白處理時期，從丙午至己酉之四年爲馮自由處理時期，從庚戌至辛亥之二年爲南方支部處理時期，以十三年短時間之大聲疾呼，卒能領導海內外輿論，以傾覆清廷，光復漢業，殊非當日參預諸子所及料也。

橫濱開智錄

開智錄發刊于橫濱山下町清議報館內，一少教粵籍留學生所創之小型月刊也。其編輯人爲香山人鄭貫一，而馮斯欒馮懋龍二人佐之，鄭號自立，又號貫公，二馮一號自強，一號自由，時人號稱三自。鄭初與湘籍留學生秦力山同任清議報編輯，以該報鼓吹保皇，流毒甚廣，乃思爲拔趙幟易漢幟之計，特創開智錄，專發揮自由平等天賦人權之真理，復撰作歌謠戲曲諧談各門，引人入勝，對於保皇媚滿之敗行醜態，漸以嬉笑諷刺之文字出之，其發行及印刷機關即在清議報事務所，以是海外各埠凡有清議報之地，莫不有開智錄。僑胞以其文字淺顯，立論新奇，多歡迎之，此報出版于庚子（民國前十二年）年夏秋間，翌年春清議報以迭受各地保皇黨責難，謂不當容許革命黨人在報社內印刷他報，遂解除鄭貫一編輯一職，而開智錄由是停刊。孫總理時在橫濱聞之，乃函荐貫一赴香港任中國報記者。

橫濱廣東獨立協會

廣東獨立協會爲留東粵籍學生馮斯樂李自重鄭貫一王寵惠馮自由梁仲猷諸人所發起，時在辛丑年（民前九年）春，東西各國忽宣傳法國要求清廷勿將廣東割讓他國之說。內外粵僑，爲之騷然，粵籍學生初在東京開會，倡議反對清廷割讓國土，自行宣告獨立，以橫濱粵僑人衆，乃移會議地所于橫濱，孫總理贊助此事甚力，僑界參加者二百餘人，每次開會之前，諸發起人恒至前田橋總理寓所商談進行方法，與中會員黎炳垣溫炳臣陳和等招待尤形殷勤，粵籍留日學生與與中會合作自此始。

橫濱支那亡國紀念會

壬寅（民前十年）三月留日志士章太炎馮自由秦力山馬君武周宏業陳猶龍朱夢溪王家駒等十人發起支那亡國二百四十二年紀念于東京上野精養軒，定期于是月十九日明崇禎帝殉國日舉行，藉以喚起內外國人之民族觀感。其宣言書分派各地僑衆，異常興奮，孫總理梁啓超均致書章太炎，願署名爲贊成人，惟事前梁忽要求取消，謂因有某種障礙，一切心照等語，是晨留學生赴會者，有程家棟汪榮寶等數百人，而上野公園各路口滿佈警察，如臨大敵，宣告奉警視總監令，禁止支那人開會，不許通過，蒞會者以原因不明，多逡巡不通，後乃知爲日政府勉徇清公使蔡鈞請求，而有此舉。時孫總理偕與中會員數人亦自橫濱來會，及詢知被日警干涉情形，乃面約發起人章太炎等至橫濱補行亡國紀念式于永樂酒樓，橫濱同志到席者六十餘人，總理主席，章太炎讀紀念辭。是晚與中會仍在此樓公宴太炎等，凡八九桌，異常歡洽。總理倡言各敬章先生一杯，凡七十餘杯始罷，太炎是夕竟醉不能歸東京，永樂酒樓係人和洋服店主人陳植雲所開設，陳亦與中會員也。

香港和記棧

和記棧者，大明順天國在香港秘密籌劃起事之總機關也，其地點在中環德忌笠街二十號四樓，先是與中會會員謝讚泰李紀堂久欲在粵舉兵革命，以逐滿興漢為宗旨，嗣結識太平天王洪秀全族弟曾被封英王三千歲之洪春魁，認為足以同舉大事之適當人物，遂推為首領，並預定國號曰大明順天國，春魁於是易名全福，示藉洪秀全福蔭之意。紀堂於是役慘然負担全部軍餉五十萬元，全福受命後，先後奉派梁慕光李植生馮通明宋居仁蘇子山（原名龔超庚子漢口富有票案有名）諸人在廣州惠州北江各地聯絡軍隊會黨，壯期于壬寅（民前十年）十二月除夕各方同時發難，其發號司令皆在和記棧處理之。及十二月下旬籌備略竣，全福先期赴粵指揮梁慕光等各項動作，讚泰紀堂等亦各預定除夕晚乘輪詣省主持一切。詎有奸人周某為誑騙巨款事，向香港警廳告密，且引警中至和記棧搜查舉發，并逮捕同志五人，而機事遂全局敗露。粵督德壽藉此破獲各黨人機關，捕殺黨人多名，全福等半載之經營，竟成水泡。在港被捕各黨人得英國殖民部電令港督以國事犯待遇，故由港督下令開釋，全福前於太平天國敗後，嘗從事航海生活多年，春秋既高，乃在港行醫自給，是役失利，遂避地新加坡，旋以病返港就醫，死於香港國家醫院，年六十有九。

香港世界公益報

繼中國日報出版後三年而出版者，有世界公益報社。是報發刊于癸卯年（民前九年）冬，為中國報前記者鄭貫公所主篇，其資本全出諸耶穌教徒林護馮清泉譚民三等，編輯人有李大醒崔通約黃世仲黃伯耀黃魯逸等，報中論調略同中國報，而色采不如中國報之鮮明，特注意於諷諧文字及諷刺圖畫，

銷場極廣，世稱香港革命黨報之第二家者是也。貫公為人豪邁不羈，任職半載，以不願受耶教範圍之拘束，即辭職他去，此報因有耶教徒支持，基址鞏固，至民國成立後數年始停刊，其功僅次於中國報。

越南河內興中會

壬寅年（民前十年）秋冬間，總理因與越南總督稻美有約，遂藉參觀是年河內博覽會之機會，並往河內相見，時稻美適因公返國，預囑其祕書長哈德安為招待。總理居河內數月，嘗致書香港約陳少白往會，有洋服商黃隆生者，粵之新寧人，平日喜讀香港中國日報，逢人必罵滿洲政府。一日總理入其店購取飾物，偶與攀談，歡若平生。繼知為革命黨領袖，堅求訂盟，并次第介紹楊壽彭羅鐵會克齊甄吉廷張奧池等入黨，是為越南創立興中會之嚆矢，因會員不多，未設會所，每次開會恒假河內保羅巴脫街二十號隆生公司為之，三年後改組為同盟會。

檀香山興中會復興與隆記報

癸卯年（民前九年）秋冬間，總理自日本至檀香山，該島原為興中會發源地，親朋故舊為數頗衆，惟是地黨務自經已亥年（民前十三年）冬，總理親函介紹梁啓超到此之後，會員誤投身保皇會籍者頗不乏人，正埠及小埠均設保皇會所，而興中會之名，則久已不復掛人齒頰矣。事詳余著中華民國開國前革命史不贅。總理此度重來已相隔八載，大有今非昔比之感，時保皇會有言論機關新中國報，其主筆為康徒陳繼儼，聞總理之來，深恐保皇黨之基礎為之動搖，乃於報上醜詆革命黨及總理個人，舊興中會員何寬鄭金李昌程蔚南許直臣林鑑泉等異常憤激。蔚南與總理本有戚誼，時在檀主辦一毫無宗旨之舊式報紙，名檀山新報，俗稱隆記報。總理遂使改組為黨報，以籌政乏人，乃親自撰文

與新中國報大開筆戰，就中以「改保皇報」一文最爲透闢，同時復致書橫濱馮自由，使代聘前中國報記者陳詩仲充任筆政，夏威夷各島僑胞自有此報鼓吹革命，耳目爲之一新，於是前誤受康黨誘騙者紛紛脫黨復黨，而新會員加盟者亦絡繹不絕。檀島新會員最得力者爲黃旭昇會長福等數十人，希墟埠（夏威夷羣島之一）新會員最得力者爲黎協毛文明黃振威球李華根古賀劉安唐安黃義鄭委等數十人，兩埠同志先後延總理至西人各大戲院演講革命救國，聽者極衆。總理此次在檀舉行與中會宣誓時，其盟書句話，始將與中會舊文添入「平均地權」四字，是爲與中會擴大誓辭之第一次。迨是歲十二月總理離檀渡美，檀山新報以所聘記者陳詩仲因駐香港美領事拒發入美護照，不克成行，遂改聘香山人張澤黎（搗伯）承乏，仍與保皇報繼續文戰，數載不止。

美洲洪門致公總堂

致公堂者，美洲洪門三合會之通稱也。洪門即天地會，三合哥老兩會皆其支派。三合會又稱三點會，在海外或稱洪順堂及義興會，在美洲則別稱致公堂，是會始創於清初康熙時代，其時距明亡未久，明之忠臣烈士再三力圖匡復，前仆後繼，卒難挽回世運，二三遺老以清祚已固，興復大業，非一時所能收效，乃創設一種秘密團體，專傳播種族思想及亡國歷史於下層社會，以爲民族復興之種子，其宗旨曰反清復明，特製各種口語暗號，以保守秘密，是即洪門團體所由起也。清季海禁漸開，粵中三合會員因避清吏摧殘，相繼避跡美洲，遂組織致公堂以資聯絡，其後太平天國失敗，洪秀全陳金剛諸部將亦跟蹤而至，而勢力乃日興盛。在舊金山者號稱致公總堂，分堂遍設各埠，凡有華僑足跡者莫不有之，殆佔旅美華僑全部人數十之七八，惟以代遠年禠，故老凋謝，漸失却本來面目，其會員能了解原有宗旨，百不得一，故戊戌（一八九七）清室政變後，康有爲梁啟超先後遊美，發起保救大清光緒皇帝會，洪門人士列籍其中者，頗不乏人，康徒歐渠甲徐勤梁啟田等且投身致公堂以利用之。總理於乙

未廣州失敗之翌年丙申（一八九六）初次遊美，嘗向洪門人士多方遊說，動以大義，致公堂會員向親會外人士爲風仔，（即奸細之稱）總理時未列籍洪門，竟視同陌路，無助之者。及癸卯（一九〇三）冬總理爲聯絡同志厚植勢力計，在檀香山毅然加入致公堂，已而重遊北美，爲清領事及保皇黨勾結移民局職員妨害登陸，困於碼頭木屋者多日，事爲舊金山致公總堂大佬（首領之稱）黃三德書記唐瓊昌所聞，乃代延美律師那文向華盛頓工商部抗爭，卒獲勝利，得以安然入境。是爲總理與美洲致公堂發生關係之嚆矢。時總理以洪門人數雖衆，而團體異常散漫，不能爲祖國之助，乃建議舉行洪門會員總註冊之法，并代撰致公堂新章規程八十條，總堂諸幹事咸贊成之，旋推舉總理及黃三德二人遊埠鼓吹總註冊之利益，預計全美會員總數約七八萬人。若註冊有效，可得美金二十萬元以上。惟是時各分黨對於總堂向少聯絡，團體日渙，威信漸失，加以各埠洪門重要職員多染康梁餘毒，渾忘却反清復明之本來面目。總理苦心孤詣，舌敝唇焦，而各分黨大都陽奉陰違，延不舉辦。總理以奔走數月，收效甚少，遂委其事於黃三德，而有歐洲之行，然總理此度遊美，對於洪門總註冊之計劃雖無若何成績，惟改組康徒歐渠甲所攝據大同日報爲革命黨報一事，實予洪門人士以長足之進步。後數年加拿大政公堂變產助餉，及辛亥洪門籌餉局之成立，即種因於是，厥功偉焉。

舊金山與中會

美洲各地向無與中會之組織，癸卯年（民國前十年）十二月下旬，總理自檀島乘高麗輪船抵舊金山，爲清領事及保皇會會員勾結移民局員從中作梗，被困於碼頭木屋者多日，賴當地中西日報社長耶穌教友伍盤照之助，與致公堂職員黃三德唐瓊昌合力營救，并向華盛頓工商部依法抗爭，始獲安然入境。既脫難，即下榻於致公堂會所，日間則僱食於中西日報，與教友伍盤照伍于衍司徒南達鄒華法鄧幹隆諸人至爲相得，以旅美僑胞多染康梁餘毒，遂託中西日報印刷部容著「革命軍」一萬一千冊，分贈全

美僑衆，以廣宣傳。同時更欲藉此開設興中分會，擬先從具有新思想之教友入手，於是召集耶教徒之有志者，假當地士作頓街長老會正道會所開興中會救國籌餉大會，蒞會者頗衆，公推鄺華汰博士爲主席，鄺爲有名學者，娶美婦爲室，時任加省大學教授，對於總理主張，異常傾倒，事前已締盟爲興中會員。是日總理演講革命救國真理後，提議請衆購買革命軍需債券，謂此券規定實收美金十元，俟革命成功之日，憑券即還本息一百元，凡購券者即爲興中會當然會員，成功後可享受國家各項優先權利云。各教友對於購券事均甚贊成。惟聞凡購券者即爲興中會會員一節，多談虎色變，謂吾輩各有身家在內地，助款則可，入會則不必。總理乃宣稱此舉志在籌餉，入會與否，一惟尊便，此項債券票面並不填寫姓名，可勿過慮。衆無異言，於是各教友先後購券得美金四千餘元。總理後借費三德周遊美國各地，鼓吹洪門會員總註冊，即將此款爲旅途之需。總理初意原欲在美奠立興中會基礎，惟結果所得，正式宣誓入會者祇有鄺華汰等數人，當時耶教青年有志入會者，原非少數，徒以司徒南達牧師危辭聳聽，致有志者稍形猶豫，而總理爲籌餉起見，遂不强之。華汰於翌年歸香港，就李陞格致學校校長之聘，旋得病身故。

舊金山大同日報

大同日報爲美洲致公總堂原始之機關報，設於舊金山士坡福街，在辛丑年（一九〇一）出版，其創辦人爲康有爲弟子歐渠甲，歐字雲樵，廣東歸善人，在康門中以能文稱，已兼任橫濱清議報主筆，時梁啟超有脫離康有爲而與總理聯合組黨之議，歐亦熱心贊同之一人，旋因康有爲嚴令制止，事遂不成，歐被派赴美主持保皇會之文興日報，以昔年居鄉時嘗入三合會，故與致公堂中人往還漸密，已而遊說堂中書記唐瓊昌，組織大同日報以爲駐美洪門機關，該堂幹事咸避其議。發刊時瓊昌任社長及譯員，歐任總主筆，以太平洋客名義，高唱廣東宣脫離滿清宣布獨立之說，凡四五萬言，大博僑衆歡迎，

其後由橫濱清議報彙編出版，即新廣東一書是也。癸卯冬，總理蒞檀香山時，嘗與新中國報記者康徒陳繼儼爲革命保皇問題大開筆戰，歐爲援應同門起見，竟於總理入美境時肆意攻擊，謂澳門人士不應爲革命黨所愚弄，致公堂大佐黃三德及該報唐瓊昌初勸歐與總理合作，歐堅不從，遂下逐客令擯之於門外，暫由總理代理筆政，即函託馮自由於留日學界中物色主筆，馮初推荐桂人馬君武，馬以事辭，乃改聘鄂人劉成禺。劉於甲辰年（一九〇四）春夏間抵美，而大同報之陣容爲之一新，自是美僑衆之革命思潮，遂因大同報之崇論宏議而一躍千丈，不獨澳門人士爲然也。辛亥七八月間，馮自由爲籌募軍餉事自加拿大至舊金山，大同報更延充記者一席，及鄂省革命軍起，馮劉二人先後歸國服務共和政府。民二年北京政府舉行參議院華僑參議員選舉，唐瓊昌代表旅美華僑總商會回國，以國民黨之助，膺選爲參議員，大同報於民元改稱中華民國公報，民三仍復名大同報，後數年停刊。

南洋中和堂

南洋英屬羣島向爲保皇會之勢力範圍，新加坡埠富商閩人邱菽園爲該地分會會長，有機關報名天南新報，日倡保皇邪說，華僑受惑者頗不乏人。興中會於庚子（民前十一年）惠州革命軍失敗之後，其將領黃福黃耀廷鄧子瑜等避居新加坡，該地始有革命黨人足跡。然其時僑衆風氣極閉塞，咸視革命如蛇蝎，黃鄧等爲工作糊口計，固絕不敢以真面目向人也，及辛丑（民國前十一年）興中會員尤列至南洋，目的在宣傳革命排滿，因一般商界頑固性成，無從入手，乃在新加坡單邊街懸壺問世，精醫花柳雜病，男婦咸稱其能，於是乘機向農工二界及義興會會員發揮反清復明之宗旨，且常投身煙館賭場，冀與下層社會意氣相投，以資運動，遂亦漸浸染阿芙蓉癖，經營半載，頗得農工人士之信仰，遂結合少數同志組織一小俱樂部，即仿效橫濱中和堂辦法，仍以「中和堂」三字名之。堂中設關羽神像，以「忠心義氣手足相扶」等語爲號召，與普通海員所設航海會所大同小異。所異者即中和堂能添設各種革

命書報以開通民智耳。新加坡會所成立之後，尤復遍遊吉隆坡，怡保，檳羅，檳榔嶼各埠，設立分黨，就中以吉隆坡會所爲比較宏偉。其所懸標幟，即用惠州革命軍之青天白日旗，然多數會員固不知此旗之歷史及出處也。時各埠會員多屬下層階級，文人中參加者只有黃世仲黃伯耀廣蔭田三人，黃等皆因在粵家計困難，少赴南洋謀生，各在小埠賭場充任書記，因時向當地報館，投寄論文批評時政，漸與尤相識，而爲中和堂會員，其後世仲得任香港中國日報記者，伯耀蔭田同任新加坡閩南日報記者，即尤推荐之力也，癸丑（民國前九年）春革命潮漸及南洋，新加坡富商陳楚楠張永福二人首贊同革命，特發起閩南日報以爲宣傳機關，尤於是報出版前贊助甚力。乙巳（民國前七年）夏間，復介紹陳張等與總理相識，旋于丙午春成立同盟會於新加坡，尤之爲力多焉。同盟會成立後，中和堂會員之有志者多由尤介紹加盟，惟各埠中和堂之小俱樂部尙有數處存在，僅爲聯絡感情起見，並無政治性質，故於乙巳後同盟會所經營之多次革命均無所表見。辛亥民國成立，尤不久返國，南洋中和堂之名義自是寂然無聞焉。

香港廣東日報

廣東日報亦爲前香港中國日報記者鄭貫公所創辦，貫公於癸卯年冬發刊世界公益報後，因報中股東及董事多屬耶穌教徒，發言立論多不自由，故於公益報出版半載，即自行辭職，復向同志另集資本，組織廣東日報以爲之繼，宗旨與中國日報略同，是爲香港革命報紙之第三種。其編輯部會羅致廣州文學之士多人担任莊諧二部著述，體裁頗爲新穎，操筆政者除貫公自任主編外，尙有黃世仲王軍演胡子晉陳樹人王斧盧偉臣勞偉孟諸人，出版後頗受廣州香港澳門各地學界之歡迎，銷場亦殊不惡，惟以資本不足，開辦不及一年，至乙巳夏秋間即告歇業，聞者惜之。

新加坡園南日報

南洋之有革命黨報，以新加坡園南日報爲嚆矢，其地址設於福建街二十一號，出資者爲閩南廈門人陳楚楠及粵東潮州人張永福二氏。先是楚楠永福等久懷革命大志，於壬寅癸卯間與興中會員尤列時有往還，及癸卯閏五月上海蘇報案起，革命思潮激蕩海外，遂決意投資創辦園南日報，以廣宣傳，尤列初荐香港同志鄭貫公爲主筆，貫公時方組織廣東日報，乃介紹中國日報記者陳思仲自代，是報籌備至甲辰（民國前八年）年春始宣告出版，除主編陳思仲外，編輯部尙有黃伯耀康蔭田何德如胡伯鑲邱煥文諸人。第一日尤列作發刊詞，署名吳興季子。初印一萬份，後減一千份，然長期定閱者僅三十餘份。蓋其時風氣未開，一般商店多視爲大逆不道，且屢誡其子弟等友不許購讀，故出版多日，仍難推銷，僅作宣傳式之贈品而已。是年冬此報乘慶祝乙巳（民前七年）新正之機會，印刷一種富有刺激性之月份牌，分贈僑衆，牌上冠以「忍令上國衣冠淪於夷狄相率中原豪傑還我河山」二十字，下題「暫理皇漢帝位滿清光緒三十一年歲次乙巳爲耶穌降生後一千九百〇五年至〇六年」及「文字收功日全球革命潮開新世局書檄佈東南」等句。中刊自由鐘及獨立旗各一，異常美觀。英荷兩屬各埠華僑工界各團體會所多懸諸座右，而報紙銷場亦因之遞增至二千數百份，中外人士對於革命黨人之觀感，遂亦爲之一變。惟此報資本全部出自楚楠永福二人，出版不及二年，前後支出約三萬元。至乙巳年冬以匯累過甚，且積欠工人薪資數月，遂不得已宣告停版。事後楚楠永福不欲民黨喉舌中斷，復有南洋總匯報之籌組。

香港有所謂報

香港廣東日報停刊後數月，即乙巳年秋間，鄭貫公復創辦一種小規模之日報，名「有所謂唯一趣

報」，內容莊諧並重，專以小品文字見長，其排字印刷均假手其他印務公司爲之，故不用自置鉛字機器等物，又不須多大資本，取價低廉，趣味濃厚，出版未久，即已風行一時，其銷路竟駕諸大報而上之，是爲香港廣州二地小型報紙之濫觴，亦爲當地革命報紙之第四種，是報操筆政者，除貫公外，有黃世仲陳樹人（猛進）胡子賢（駿男）歐星父（仙平）盧偉臣王秋涓（軍演）駱漢存諸人，英才濟濟，可稱一時之盛。當乙巳丙午（民前六年）間，港人曾先後發起馮夏威陳天華兩烈士追悼會于西營盤杏花樓，參加者數千人，此兩會皆由鄭貫公等主持，實隱然執全港新學界之牛耳。及丙午夏，貫公忽染疫逝世，讀者莫不惋惜，是報以乏人支持，旋改組爲東方報。

下編 同盟會時期

緬甸仰光新報

甲辰年（民國前八年）康有為自印度抵緬甸，以保救清光緒帝為號召，華僑受感者頗不乏人，康以閩商莊銀安名望素隆，特任為全緬保皇會會長，設會所於仰光五十六路，時銀安與股商多人開設仰光新報于勒達街二十號，自任報館經理，其股東思想新舊不一，故報社毫無宗旨，主張不定，特一保守式之報紙而已。乙巳年（民國前七年）五月湘人秦力山（力山傳載余拙著革命逸史一集）自香港至緬，見仰光新報形式腐敗，思有以改革之。遂由閩籍同志徐甘泉介紹見銀安，詳述康梁棍騙海外同胞之經過，及革新該報言論之必要，銀安豁然覺悟，允設法改良，力山於是草革命箴言二十四章，凡六萬餘言，登出後，南洋各埠僑眾爭相傳誦，保皇黨徒因而中悔脫黨者，日有其人。時報館董事有隸保皇會籍者，恨力山攻擊康梁不留餘地，強將未刊餘稿私行燬滅，以為報復，故此文僅刊至十六章而止，所餘八章盡被埋沒，讀者莫不引為憾事。仰光新報自是復為頑固派所操縱，銀安及徐甘泉陳贊周等乃組織一商務調查會月報，名為振興實業，實以鼓吹民族主義為宗旨，欲延力山為編輯，時力山方在滇邊干崖辦學，正擬尅期返緬，就是報之聘，詎湖行時忽染病身死，銀安等聞耗，如失師保，乃延張石泉蕭少珊二人主持筆政，出版數月，毫無精采，與仰光新報相繼停刊，至戊申（民國前四年）八月緬甸始有正式革命黨報之出版。

香港同盟會

香港中國同盟會成立于乙巳年秋冬間，是歲六月杪 孫總理創設同盟會本部於東京，八月初十日

首派馮自由李自重至香港廣州澳門等處組織分會，馮抵港，即與陳少白籌商改組興中會為同盟會，新舊同志，先後加盟者，有陳少白李紀堂容星橋鄧蔭南鄧貫公李自重黃世仲陳樹人李樹芬鄧警亞盧信慶平子溫少雄梁擴凡李孟哲李伯海諸人，衆舉陳少白為會長，鄧貫公為庶務，馮自由為書記，黃世仲為交際，會所即假中國日報社長室為之。香港分會向例須兼理西南各省之軍務黨務，及南洋美洲各地之交通事務，故分會長一職極為重要。成立未久，總理即由日本赴南洋，船過港時，在舟中召集同志開黨務會議。及十一月，黃克強亦來，旋繞道赴桂林，擬策動清防營統領郭人漳反正，此外鄂人吳岷湘人梅寬仙等因公來往湘鄂桂粵諸省，均由香港分會招待。

丙午（民國前六年）八月中國報改組，陳少白辭同盟會長職，衆舉馮自由代之，次年丁未為同盟會西南各省軍事最活動之時期。總理先後派胡漢民汪兆銘二人駐港協助馮自由進行一切，時受任發動廣惠潮欽廉各屬軍務者，有許雪秋黃耀廷鄧子瑜余銘卿劉思復王和順諸人，分派各方協助者，則有方瑞麟喬義生方漢成李思唐郭公接方次石李次溫池亨吉萱野長知（池萱均日人）謝良牧謝逸橋張煊張谷山張樹楠朱執信胡毅生何克夫譚創英莫偉軍柳揚谷鄧慕韓劉德杭諸人，在受任發動人中，許雪秋曾於是年二月策動潮州饒平浮山埠會黨奪取潮州府城。屆時，偶值風雨大作，不能集合而止。四月復策動余既成陳湧波等在潮州黃岡城舉事，以械劣失敗。九月日人萱野長知租用日輪幸運丸載運大量軍械駛至惠州汕尾海面，港分會預派雪秋屆期接械大舉。以雪秋措置不善，致誤事機。鄧子瑜則担任惠州發難之責，管遣林旺陳純孫穩等起事于歸善縣七女湖，與清軍轉戰十餘日，至彈藥告竭始散。劉思復於四月抄入廣州謀炸清提督李準，以響應潮惠之師。詎于五月初一日因裝置炸彈失慎，斷去一臂，為警吏拘捕入獄，以上數役為港分會直接指揮之軍事。其他八月欽州防城之役，及戊申（民國前四年）二月欽州馬篤山之役，則由總理在越南河內親自發動，港分會祇任供應軍用品之責而已。故丁未戊申兩年同為港分會處理軍務最殷繁之時期，而丁未尤為緊張。各方同志來往港地者，幾於應接不暇，

因是中國報社之外，另在堅道及普慶坊，摩理臣山道，灣仔進教園，皇后大道各街分設招待所多處，以收容之。至於黨務亦異常發達，先後派出代理主盟員及軍事聯絡員多人，分赴廣州虎門黃埔澳門潮汕歸善博羅梅縣興寧連州北海梧州潯州柳州南寧廈門各地，發展黨務及聯絡軍隊，各方同志於此兩年相繼加盟者，有張谷山姚康平何克夫譚創英莫偉軍黃旭昇陳佐平溫子純陳純林旺孫穩詹承波吳金標余既成余通陳湧波林英俠蕭竹漪李子偉許佛童陳二九林五張人傑（靜江）周覺（伯年）倪映典方紫袖黃伯洲李煜堂謝英伯巴澤憲盧岳生李海雲葛謙譚馥嚴國豐會傳範黎夢羅樹霖楊希說周毅軍李濟民蕭惠長劉古香張鐵臣竊立權劉培欽林菊秋等千餘人，及戊申冬十一月，湘人葛謙譚馥等欲乘清帝后逝世，運動駐廣州防營反正，葛親至香港謁馮自由，求電總理接濟，并邀黃克強譚人鳳二人來粵主持，馮葛未得總理覆電而事洩，全局瓦解，葛謙嚴國豐譚馥等死之，港粵同志乃秘密開會追悼，并聯款恤其遺族。

已酉（民前三年）以前，港分會忙於軍事，不便大張旗鼓招攬黨員，以避偵探耳目，自戊申三月河口革命軍失敗，同盟會之氣大傷，軍事進行因之停頓一年有餘，遂得專心黨務，改取開放主義，以廣收同志為務，是年二月特開新會所于德輔道先施公司對門某樓，榜其名曰民生書報社，黨員日常開會，不復如前之秘密，另在廣州省垣河南分設機關，名守真閣，由高劍父潘達微徐宗漢朱述唐梁煥真等籌備成立，會務亦頗發達，是年港粵兩地加盟者，有劉一偉陳元英馬達臣譚民三李以衡陳逸川黃軒胃關非一何麗臣何劍士梁煥真何輯民陳自覺梁藻如杜藥漢陳瑞雲蔡忠信潘達賢莫紀彭李文甫林直勉羅道賢黃俠毅張志林陳哲梅何振馬小進易俠胡津林廖俠劉守初陳俊朋李昌漢李文啓李少穆朱潤芝洪承點容銓陳恭譜麥瑞祺陳炯明黃洪昆王占魁江運春尤龍標甘永宜易培之黃宗漢蘇美才孫武等二千餘人，就以倪映典所招致新軍兵士居大多數，惟無名冊可考。至十一月，民生書報社以會所過狹，復遷于中環德輔道捷發號四樓，易名少年書報社。庚戌（民國前二年）春馮自由因改就雲高華埠大漢日報之聘

謝會長一職，衆舉謝英伯承之，謝於辛亥年夏赴檀香山，由陳逸川代理會長。

己巳秋冬間，同盟會南方支部成立，與港分會劃分職權，自後西南各省黨務軍務由支部主之，香港地方黨務由分會主之。衆舉胡漢民爲支部長汪兆銘爲書記，林直勉爲司庫。冬十一月倪映典自廣州來港，報告運動廣州新軍成績，衆決議大舉，即電總理請求接濟，并邀黃克強趙聲譚人鳳來港主持。十二月間黃趙譚先後到港，總理自美國三次電匯到八千元，同志李海雲亦提其商號存款二萬餘元，以充義舉，衆以籌備成熟，定期庚戌正月初旬大舉，詎因新軍兵士於除夕以購名片細故，與警察發生爭執，遂成軍警互相毆鬥之大風潮，粵督袁樹勛聞變，立派防營彈壓，遂成敵國，倪映典初擬勸新軍勿遽暴動債事。及正月初二早抵燕塘，知大勢無可挽救，遂毅然領導全軍發難，以各槍枝板機及彈藥早爲清軍密令繳去，致戰鬥力全部損失，遂爲清軍所收，竟以身殉之。是役功敗垂成，洵爲歷次義軍之最大憾事。南方支部經此失敗，黃克強趙聲胡漢民等乃赴南洋檳榔嶼謁總理籌劃再舉。是年冬總理號召各埠同志擬集巨款，作捲土重來之計，南洋美洲諸地黨員均如響應，踴躍以從。黃趙胡等遂返港設置革命軍統籌部，以策動一切，是即辛亥三月二十九廣州黃花岡之役。實佔全部革命史最輝煌之一頁。是役香港及各方來往同志莫不奔走駭汗，爲義師盡力，其壯勇義烈可歌可泣之事迹，已有專書記錄，茲不贅述。及是歲八月武昌革命軍起，南方支部先後遣派黨員分赴全省各路策動響應。而駐港各同志亦多自動赴義，惟恐不力，用成辛亥九月，廣東省城不流血而光復之殊助，是則香港同盟會員多年奮鬥之結果不容湮沒者也。

新加坡南洋總匯報

圖南報於乙巳（民國前七年）春以資本不足歇業，陳楚楠張永福二人不忍革命之喉舌爲之中斷，復于是年秋聯絡商人許子麟陳雲秋沈聯芳朱子佩諸人創辦南洋總匯報，以爲之繼。是報由革命派及中

立商人派各佔資本半數，雲秋素性畏官，胆小如鼠，力誠當事人不得登載激烈文字，而陳楚楠張永福不之恤，仍使編輯人高談革命如故。至丙午年（民國前六年）春雲秋恐為革命黨所累，遂提出拆股退讓之議。後仍改為抽籤，由兩派中之抽得者接受報業，結果為雲秋一派所得，雲秋接受後，乃約保皇會員某等加股合辦。不久，是報竟成保皇會之純粹機關報，康徒徐勳區渠甲伍憲子等遂憑藉之與革命黨為敵，各方同志咸咎陳楚楠張永福二人事前措置不善之失策。

暹羅華暹日報及同盟會

華暹日報設於暹羅國京城檳角埠生日橋側五十三處，為蕭佛成陳景華沈荇思等所創辦。先是香山人陳景華任職廣西貴縣知縣，因得罪粵督岑春萱，亡命暹羅。旋與老華僑蕭佛成等發刊此報，內容分中國暹羅兩種文字，暹文部份由佛成及其女公子任之。出版一載，漸主張革命，於乙巳年冬與香港中國日報互通聲氣，并託中國日報代聘主筆，中國報乃推荐前有所謂報記者王斧及前閩南報記者康蔭田二人應之，僑商之同情革命者，有王杏洲陳美堂何少麟陳載之朱廣利馬興順梁挺英諸人，皆該地商界中之名望素著者。戊申年（民國前四年）冬，總理借胡漢民胡毅生何克夫盧仲琳等自新加坡抵暹，僑商開會於中華會館，列席者百數十人，越日暹政府即來干涉，限總理於一星期內離境，并不許談及政治問題。駐暹美國公使聞之，以總理為檀香山籍公民，特向暹政府提出抗議，因得延期一星期，因是總理不便再赴會演說，惟秘密組織同盟分會，華僑入會者頗不乏人，衆舉蕭佛成為會長，陳景華為書記，沈荇思為會計。總理居暹十日，仍返新加坡，留胡毅生盧仲琳二人助理華暹報筆政。己酉（民國前三年）春馬興順因事返潮州原籍，旅暹保皇黨人以馬為華暹報大股東，特致電粵督，控以附逆黨罪名，清吏因是將馬逮捕繫獄。陳景華受旅暹同志之託，轉回香港設法營救，卒賴粵紳江孔殷代為斡旋，保釋出獄。馬於開釋後未久，以在囚備受虐待，得病逝世。

新加坡同盟會

新加坡同盟會成立於乙巳年冬，先是總理於是歲五月從歐洲赴日本過新埠時，尤列引閱南報同志陳楚楠張永福林義順等登舟相見，總理謂在歐時，德法比諸國留學生已成立革命團體，此行到日本即當組織革命黨總部，南洋各埠可設分會，不日當由日本寄來章程及辦法，囑各人預為籌備，楚楠等唯唯。總理蒞日後，即於六月杪與各省志士發起中國同盟會於東京。是冬重遊新埠，適是時該地政府禁止入境之期已滿，楚楠等遂歡迎登陸，尋設立同盟分會，為南洋英荷兩屬之總機關部，假晚晴園為會所，首次開會加盟者，有陳楚楠張永福林義順許子麟劉金鑒黃耀廷尤列鄧子瑜張華丹吳悟叟林幹廷張秉庚等十二人。聚舉楚楠為會長，永福副之，許子麟為會計，林義順為交際。以後陸續加盟者，有丘煥文何德如沈聯芳盧耀堂李曉生李渭川謝已原謝心準謝儀仲黃乃裳許雪秋鄭聘廷胡少翰何心田李凌溪黃康衢陳武烈陳芸生林文慶陳嘉庚林航葦黃吉宸吳應培陸秋露周之貞康蔭田徐統雄周華羅仲崔黃鶴鳴李文楷李竹癡郭淵谷胡伯驥等四百餘人，繼復派員分赴英荷兩屬及緬甸各埠設立分會，楚楠等更向各埠同志招股重組黨報，於丁未（民國前五年）七月出版，即同盟會南洋唯一機關之中興日報是也。戊申（民國前四年）二月，總理從越南河內移駐新埠，寓東陵東明律一一一號，會務益形發達，是歲四五月間黃克強胡漢民以雲南河口之役兵敗，亦先後離越南到新，是役敗軍將士韋雲卿等六百餘人被越南政府遣送前來新埠，英官初不許入境，經總理向當地政府聲明為政治犯，并非亂民，并使楚楠永福等向當局保證一切，始許登陸，是時對於革命軍將士之給養問題極形困難。總理令楚楠開闢中興石山於蔡厝港以安插之，且介紹於振椰嶼吉隆坡吡叻文島各埠工廠礦場農場，使各安生業。經營數月，而此項善後問題，始告一段落焉。

戊申年秋，總理以英荷兩屬各地陸續成立分會及通信處者，有百數十埠，乃更設立南洋支部以

統治之。特派胡漢民爲支部長，另訂中國同盟分會總章十六條及通信辦法三條，通告各處團體，一律遵守。時河口敗軍將士，雖已多方設法安置，然以份子複雜，良莠不齊，常發生妨害地方治安情事。清領事更藉端要求英吏干涉革命黨行動，因之黨務進行愈形棘手。翌年己酉（民國前三年）春，總理遂決意將南洋支部移於檳榔嶼，令胡漢民歸香港擴張南方黨務，自赴歐美遊歷，以謀國際上之協助。新埠黨務自總理他適後，中興日報旋以乏人支持，遂告停刊，遂於無形中失其領導之地位。及庚戌年（民國前二年）十月，黃克強趙聲胡漢民等赴檳榔嶼謁總理，謀集巨款在廣州再舉，各埠黨員莫不踴躍捐輸，胡漢民鄧澤如等嘗詣新埠，召集黨員開會於晚晴園，蒞會者有沈聯芳盧禮明李孝章陸秋露周之貞等百餘人，合得捐款三千餘元，中以沈聯芳所捐一千元爲最巨，其後各復加捐若干，合英屬各埠共得四萬七千餘元，是即辛亥三月黃花岡一役華僑義捐之一部。

越南西貢堤岸同盟會

乙未年冬，總理偕黎仲實胡毅生鄧慕韓等自日本到越南西貢，該地法國銀行正副買辦會錫周馬培生及僑商李竹痴等大爲歡迎。西貢爲法國商行林立之區，而華人商店及各大米穀則在附近之堤岸，故總理留西貢一二日，即赴堤岸就華僑之歡迎會。該地閩粵商人李曉初李卓峯劉易初黃景南關唐李亦愚顏太恨潘子東諸人招待優渥，即日成立同盟分會，舉劉易初爲會長，李卓峯副之。即以易初所設之美樓街三〇四號昌記行爲通信機關。自後西貢堤岸兩埠同志對於粵桂滇三省革命軍事，均先後匯助巨款，爲他處僑商所不及。就中以會錫周馬培生李卓峯所捐爲最巨。總理到西貢數次，錫周培生等有求輒應，毫無吝色，黃景南開設賣豆芽小店，市人稱之曰芽菜祥，每日恒所得投入撲滿中，貯爲捐助革命之需，時人聞而義之。丙午年秋，香港中國日報改組，李亦愚潘子東顏太恨等合認新股三千餘元，中國報大得其助。

香港東方日報

鄭貫公逝世後，香港有所謂小報乏人領導，勢將停刊，同志劉思復陳樹人胡子晉謝英伯易俠等乃另集資本接辦該報重新改組。易名為東方報，其體裁與前有所謂報略同，亦一小規模之日報也。此報發刊半載，即以資本不繼停版，時在丙午年秋至丁未年春。

檀香山民生日報

檀香山隆記報自改組為興中會機關報後二年，社長程蔚南以年老力衰，向各同志提議，擬轉讓別人集股接辦。於是會長福等乃將該報從新改組為日刊，易名民生日報，社址設於斯密士街一〇一六號，仍聘張澤黎為主筆。時保皇黨之新中國報記者陳繼儼已歸國，改聘廣西人梁文興（號秋水）承乏，梁為康徒湯覺頓之小舅，向在上海廣智局任編校員。抵檀後，高唱君憲主義，一如前人，澤黎對之口誅筆伐，經年不休。至丁未年（民國前五年）春澤黎因事辭職，民生日報乃致函東京民報，請總理推荐主筆，總理命前香港中國日報記者盧信應之。盧抵檀數月後，以編輯部發言權，時遭股東干涉，憤然辭職，擬即買舟離檀，會長福堅留之。盧謂必須另創一報，編輯人須有絕對之言論自由權，伊始可取消東歸之意，長福從之，因即另行集資，授盧以編輯全權創辦新報，即自由新報是也。是報以自由名，即表示名實相符之義。

檀香山自由新報

盧信既創辦自由新報，即于丁未年夏秋間出版，報面所載編輯人盧梭功，即盧信別號也。盧自任

社長，黃楚（時初）爲司理，孫科爲譯員，會長福黃亮譚遠梁海等爲董事，每星期一三五等日出版，是爲隔日報式，發刊後，言論絕對自由，不受股東干涉，因得高談革命排滿，無所顧忌。駐檳清領事梁國英曾電請清政府禁止入口，并威嚇該埠僑商，謂當行文粵省查抄該報股東原籍財產，致令同志商人多有戒心。時梁領事通告僑衆，每一僑民須繳納註冊費一元二角五分，自由新報斥爲非法敲詐，攻之甚力，於是全體華僑開大會於亞鴉刺公國，公推鄺良爲主席，決議驅逐梁國英，故請領事徵收註冊費之計劃，因之完全失敗，自由新報之力也。梁國英惱羞成怒，遂與保皇會再相勾結，向當地移民局指陳虛信爲報館主筆，不在中美條約規定祇許我國官、商、教、讀、遊、（即官吏商人教員學生遊客）五種人入境之列，按律應撥送出境等語。慮乃延律師向華盛頓工商部抗爭，卒獲「主筆亦屬教員」一項之解釋。此案於是完全得勝。嗣後我國報館主筆皆可援例入美國境域，即自由新報力爭之結果也。戊申己酉（民國前三四年）間，盧復編印「自由言論」「革命真理」「人道」「揚州血淚」四書行世，僑衆思想愈形開發。總理於庚戌年春重遊檳島，即成立同盟分會，盧之力爲多焉。辛亥夏間盧借黃楚返香港，溫雄飛代理筆政。未幾溫亦回國，由謝英伯吳榮新二人先後承乏。民國成立後，自由新報繼續支持三十餘年，至今猶屹然存在。海外同盟會各機關報能保持壽命者，獨舊金山少年中國報及此一家耳。

英屬七洲府同盟會

七洲府即英屬海峽殖民地之總稱。凡新加坡檳榔嶼（又名庇能）吉隆坡怡保吡叻暹羅大小各埠均屬之。其首府設於檳榔嶼。丙午 總理派陳楚楠林義順至檳榔嶼設立同盟分會，先後加盟者有吳世榮黃金慶，陳新政，辜立亭，林志誠，丘明昶薛本木陳民情，徐洋澄，熊玉珊，呂毓甫，徐宗漢，王壽蘭，丘有美，林福全，丘文銘，潘奕源，丘能言，鄭玉指林世安，陳璧君，王德清諸人，公舉吳世榮爲正會長，黃金慶爲副會長。金慶等籌設檳城日報，係商界中立性質，然於革命宗旨隱然贊成。又設檳城書報社，

地址在甘菜園九十四號，條理整然，足爲南洋各埠書報社之模範。庚戌年（民國前二年）夏秋間，仰光同志莊銀安以該埠所設光華報迭受清領事之摧殘，乃避地檳榔嶼與陳新政黃金慶徐洋溢等，重組光華報於其地。聘雷昭性（鐵崖）方次石周杜鵑等爲主筆，崇論宏議，與新加坡之中興日報後先輝映。先是總理於己酉三月赴歐洲時，已將南洋支部移至檳榔嶼，及庚戌七月從日本再來南洋，即挈眷移居檳榔嶼柑仔園。是時曾通告南洋各埠，令做美洲黨員新例，將盟書內「中國同盟會會員」字樣改爲「中華革命黨黨員」。然爲日無多，事實上未易實行。是冬黃克強趙聲孫德彰胡漢民等同聚檳榔嶼，謁總理商定廣州大舉策路，決議分途募款，以利進行。未幾總理因在清風閣演說革命，爲當地政府限令一星期離境，遂有美洲之行。其眷屬仍居柑仔園，每日家費由檳榔嶼及吡叻吉隆坡芙蓉四處黨員分任供給之。統計辛亥三月廿九廣州之役，英屬七洲府各埠合籌軍餉共四萬七千六百餘元。至於各埠得力黨員，在吉隆坡有陳占梅，阮英舫，阮卿雲，阮德三，王清江，劉襟俠，陶秋傑，陶秋泰，丘怡領，王君贊，陳秀蓮，張志昇，杜棠等。在怡保有區慎剛李源水，李孝章，湯伯令，鄭蝶生，劉業興，黃怡益，梁新楠等。在芙蓉有黃心持，譚容，朱赤寬，蔡熾三，伍熹石等。在爪哇那則有鄧澤如等。在麻六甲則有李月池沈鴻柏等。在關丹有陸秋露等。在金寶有楊棟等。在林明有馮子芸等。在太平有陸文輝陳志安等。在式叻有鄧清泉等。在麻坡有湯壽山，劉靜山等。在砂勞越有羅從諫，蕭春生，李振殿等諸人。又各埠多設書報社，其中有純粹爲同盟分會者，有與同盟會員具相當關係者。有因當地商會或中華會館爲守舊派或保皇會所把持故另設新團體以樹對抗者。此類書報社有百數十處，其地名社名詳載余著中華民國開國前革命史，不贅。

香港少年日報

香港有所謂報停刊後，該報編輯人分爲二派，各續辦小報以爲之繼。一爲東方報，一爲少年報，

均與有所謂報同一體裁，少年報發刊于丙午丁未年間。地址在上環海旁，主編為前中國日報記者黃世仲，康蔭田，楊計伯盧星符等佐之。世仲所著『太平天國演義』小說初在有所謂報登載，此報連續載之。其消路足與有所謂報相伯仲，惜乎出版未及一載，即因款絀停業。

雲高華英日報

華英日報設於英屬加拿大之雲高華埠哈士登街一百號。為耶穌教徒周天霖，周耀初等所創辦。天霖係該埠有名之雜貨商，丙午年秋冬間與各教友組織此報，以宣傳耶穌教福音及開通民智為務。特函托廣州格致書院院長鍾榮光代聘主筆。鍾介紹崔通約應之。崔粵之高明人，初為康有為弟子，後入耶穌教，曾佐鍾榮光任澳門格致書院教員。癸卯香港世界公益報出版，被派往日本任通信記者，及就華英日報之聘，雲高華埠原有保皇會宣傳機關曰日新報，其主筆為何卓競，以崔出身康門，彼此尙能相安無事。丁未某月華英報載粵吏通緝保皇會員新聞一則，保皇會以崔為有意侮辱師門，竟在當地法院控告華英報謾謗名譽，崔乃向該埠洪門致公堂求助，且與中國日報通聲氣，乘勢提倡革命排滿之說，是為加拿大報紙皈依革命之嚆矢，華英報與保皇報訟案牽纏一年有餘，以該報耶穌教股東財力薄弱，無以為繼，不得已停刊，崔旋之美國舊金山，充任中西日報記者。

新加坡中興日報

新加坡自南洋總匯報分裂後，革命喉舌緘默者一年有餘。丁未年春，陳楚楠，張永福，許予麟，陳先進，沈聯芳，鄧子瑜，林義順諸人向各埠同志募集資金組織中興日報，以繼承昔年圖南日報之統緒。以籌備數月，至是年七月十二日始告出版，地址在吉寧街十二號，初由馮自由在港代購鉛字，並

介紹中國報記者何子耀充任編輯，何以事辭職，乃改延田桐玉斧承乏。發刊未久，即與南洋總匯報爲革命論與立憲論之大筆戰，先後任撰述者有居正，陶成章，林時爽，胡漢民，方瑞麟，林希俠，張紹軒，周杜鵬，何德如，胡伯驥諸人，任司事者尚有林義順，鄧慕韓，湯伯令，蕭百川，吳悟叟，周華，羅仲霽諸人，當兩報筆戰期間，總理適於戊申年（民國前四年）二月從越南移居南洋，故東京民報諸記者亦相繼蒞止，一齊加入戰線，論爭至爲激烈。時總匯報管湊合民黨記者姓名戲撰一聯以嘲中興日報曰：「藥石（居正筆名）無靈精衛含冤填恨海（田桐筆名）。漢民遭劫杜鵬啼血怨西林（張紹軒別號）。」可謂諷而虐矣。中興報銷數達四千餘份，各埠僑衆直接受其感化，實非淺鮮。及己酉年三月。總理遠遊歐美，陳楚楠以歷年爲革命耗資，發生兄弟爭產涉訟事，張永福亦因商務虧折，幾致破產，中興報負債纍纍，屢次招股，均隨手殞盡，無法抵欠，卒於庚戌夏間停版歇業，南洋黨員莫不引爲憾事。

新加坡三大書報社

新加坡革命同志之組織書報社，遠在同盟會成立前數年，有星洲書報社者，成立于壬寅年（民國前十年）。其倡辦人爲鄭聘廷，社址初設于吉寧街，乙巳年乃遷至丹絨巴葛禮拜堂樓上。社中陳列各種書報，任人瀏覽，中以革命書報爲多，亦宜作革命機關之一也。戊申年同盟會員何心田，何德如，胡兆鵬，胡亭川等更設立開明演說閱報社，按期敦請民黨名流演說革命真理。實開南洋風氣之先。更有郭淵谷，康蔭田，何蘆生，謝坤林，沈飛龍，周獻瑞，陳鐵漢，何心田，何柏軒，吳逢超，何海星，陳毓卿，何漢塗諸人，組織演講隊，每星期日在各通衢爲抨擊清政府及反對立憲之露天演說，慷慨激昂，聞者感動。辛亥春趙鈞溪，潘兆鵬，張仁甫，劉七輝，劉蒼，劉任臣，郭淵谷，許伯軒，謝坤

林，鄭子匯，吳一鳴，許夢芝等發起同德書報社于亞來良街。此外英荷兩屬各埠先後開設書報社多處，均與革命黨員有直接間接之關係。

越南河內同盟會

在南洋各埠華僑之中，與革命工作有直接關係者，以越南河內海防二處爲首屈一指。蓋其地與粵桂滇三省邊界接壤，總理與黃克強，胡漢民，王和順，黃明堂，關人甫諸人經營三省軍事，均假道越邊爲出發點也。總理於壬寅年參觀河內大博覽會時，已與當地華商楊壽彭，黃隆生，甄吉廷，張奧池，吳梓生等共設立中分會。及丁未春，總理爲策動三省軍事起見，駐節河內，設機關部於甘必達街六十一號，即將興中會改組爲同盟會，先後加盟者有楊壽彭，黃隆生，吳梓生，張奧池，甄吉廷，王和順，黃明堂，關人甫，曾克齊，羅享，李福林，譚義，黎廣，李菱，李祐卿，劉岐山，甄璧，梁秋，高德亮，麥香泉，何海榮，饒章甫，李應生，張邦翰，盧仲琳，張翼樞，林煥廷，陳耿夫，彭俊生，黎量餘，劉梅卿，梁建葵，梁瑞廷，陳二華，梁恩等數百人。海防分會設於台灣街三十二號萬新樓，以劉岐山爲會長，甄璧，林煥廷，陳耿夫等爲幹事，其他鄰接粵省欽州防城縣東興鎮，總理及黃克強，王和順于丁戊兩年經營欽廉各地軍事。即由海防就近發動及配備一切。戊申年二月黃克強率衆由越邊進攻欽州上思所需之彈藥，係由香港馮自由購辦，托河內輪船買辦彭俊生及于愛輪船買辦黎量餘二人密運至海防，交劉岐山接收。岐山招待來往同志非常周到，時人以小孟嘗稱之。張奧池任河內廣東會館書記多年，生平有寫信癖，凡海外有同盟會之處，莫不寄書通報消息，且任香港中國報之義務訪員。丁未十月鎮南關及戊申三月河口之役，總理迭向當地法國商行購入盒子砲及手槍多具，以餉措不足，多由楊壽彭，梁秋等負責保證，限期償還借款。黃隆生于河口之役。因運米糧供應前方，

致爲法政府遣送出埠。此外楊壽彭，劉岐山，甄吉廷，麥香泉，高德亮，德章甫，陳二華，梁恩諸人，或輸送武器，或接濟糧食，或籌募經費，或參加義師，均被陸續驅逐離境，轉赴香港。自戊申四月以後，同盟會籍之僑商因有參加革命軍之嫌疑而被法官下令驅逐，不得已犧牲商業者十餘人，損失財產，實屬不貲，各埠黨員直接對於革命之貢獻，不得不首推河內海防二地矣。

緬甸仰光同盟會

族緬甸華僑之具有新思想者，始於癸卯（民國前九年）閩人林國重，陳金，杜誠誥，陳甘泉，莊銀安，徐贊周諸人之倡設中華義學於仰光大埠，同時莊銀安徐贊周更另設一益商夜學，以利僑胞之日間不暇攻讀者。是歲康有爲由印度來緬組織保皇會，銀安及一部僑商誤認康爲熱心愛國，頗爲所惑，獨陳甘泉，徐贊周數人主張革命排滿最力，不肯入其彀中耳。乙巳（民國前七年）五月湘人秦力山自香港抵仰光，以閩人李竹癡之介，下榻於陳甘泉宅，甘泉引之見銀安，詳述康梁棍騙華僑歷史，及已身參加漢口富有票經過，銀安豁然覺悟，於是衆僑商公請力山重修中華義學章程爲民族主義教育，並求時向銀安所主辦之仰光新報撰作論文，以啓愚蒙，力山因作革命箴言六七萬字，連續登載報上，緬僑之知識因之大開。是文刊至十六章，竟爲該報頑固股東私自燬滅，讀者咸以不得一窺全豹爲憾，時力山方在滇邊干崖土司辦學。丙午（民國前六年）秋，徐贊周等另組織一商務調查會月報以代仰光新報，力邀力山回緬主持筆政，力山於首途前得病，竟於是年十月十一日卒於干崖，說者謂緬甸革命黨之成立，因力山之死而延擱兩年，非無故也。

仰光同盟會之成立，較南洋英荷兩屬稍遲。戊申年春三月王羣由日本帶來同盟會本部委任證書，徐贊周，陳仲赫，陳守禮，張源，陳國章，沈繼昌，林水都，王永和，林金源等十餘人率先加盟，旋

開第一次成立大會於仰光大賀胥蛋園，以外間反對者衆，開幕三月，僅得會員三十七人，贊周等乃商設機關報，以張黨勢，得巨商陳玉著，張永福（與新加坡之張永福同名異人）陳金在，曾廣庇多人附股，報社頓以成立。是歲八月朔日同盟會機關之光華報出版，主筆爲滇人楊秋凱及鄂人居正二人，均由孫總理推荐而來，出版月餘，黨勢大振會員增至四百餘人，同盟會會址遂由益商學校遷於河內濱街與百尺路轉角之三樓，其初定名演說社，以避忌者之耳目，後改稱覺民書報社，會務日以發達。是秋九月總理特派汪兆銘，吳應培二人到緬甸指導進行，冬十一月二十日開選舉幹事大會，公舉莊銀安爲正會長，盧喜福爲副會長，陳財春財政，沈繼昌會計，陳振川庶務，林鐵漢書記等等，光華報出版後數月，復派居正陳仲赫二人赴緬甸各埠開展分會，前後成立分會多處，并派定各埠有力黨員爲主盟人，就中規模較大者二十五處，茲開列埠名人名如次：

埠名	主盟人	埠名	主盟人	埠名	主盟人
木各具	陳虞卿 鄭耀蒸	力不丹	丘景芳	緬字	李景興 蔡壽民
沙巴	陳延謨	新懿邁	陳就正	瑞帽	陳巽南 李曠耀
毛淡棉	丘伯鐘 朱緯業	渺略	蘇佃仕	卑謬	楊景藩 林幼雨 常壽山
居臘	林啓仁	繞彬九	陳振玉	敏建	周子器 陳紹平
洞遇	陳國珍 杜子乾	榜地	區伯揚	洞枝	黃錫三

彬文那	陳昌燾	楊明察	知 啟	盧省三	瓦 城	劉觀於	陳太昌	楊 名
興沙塔	陳頤陣	林明澈	勃 臥	李萱琳	密 沙	陳章遜		
蒙 摩	尹壽生		仁蘭姜	鄭 庇	勃 生	陳子卿		
吉 桃	陳文造							

緬甸同盟會成立後，以先後籌款維持黨報之故，對於總理歷次募餉不能多所協助。戊申至辛亥之四年間，汪兆銘，陶成章，胡漢民，黃克強等相繼來緬籌餉，銀安等每次均以數千元助之，各黨員因迭受清領事及保皇黨之構陷摧殘，極形艱苦，據徐贊成所藏緬甸同盟會人名免冊，從戊申三月成立起至辛亥年止，實發給會員底號共二千三百四十三人，為國內外各地同盟會所存名冊之最完整者，殊屬難能可貴。

仰光光華報及進化報全緬公報

仰光光華報設於百尺路舊門牌六十二號，初由黨員莊銀安，徐贊周，陳守金，陳興瑞，陳玉著，李海國，陳清波，陳文豹諸人集資緬幣八千餘盾，以三千盾承購舊日仰光新報之鉛字趕行出版。莊銀安任經理，陳仲赫副之，總主筆為楊秋帆居正二人，先後助理編輯者，有黃大發，何榮祿，蘇鐵石，傅春汎，陳銘平，林文曲，黃蘭士諸人。其股本多半招自普通商人，非盡黨員也。初出版，即大倡革命排滿，尤抨擊康梁，不遺餘力。康黨嫉之如眼中刺，陶成章所著「浙案紀事」，即在是報登載，未幾秋帆以事入滇，荐滇人呂志伊（天民）自代，康黨初曠使此報股東之非黨員解散報業，計不得逞。會

是冬清帝母子同時斃命，天民在報上徵聯曰：「攝政王與攝政王亡建國興亡兩攝政」。應者雖多，惜無佳構。時黨員盧喜福，忽發奇想，私電袁世凱，請立漢人爲帝，乘機革命以傾覆滿清。清廷於是根究電報來源，遂向英使館交涉，重訂電報新約，以後旅緬華僑有電報達本國政府者，不得代爲傳遞，此例至民國成立後二十餘年猶未廢除也。時保皇派商家乘勢冒用全體商人名義，請清廷簡派領事駐緬，清廷准之，旋派蜀人蕭永熙到仰光任領事一職，光華報因該領事藉爲喪家點主事，時向僑商敲詐巨款，天民特用「領事神主」爲撰一聯，加以譏刺，蕭永熙老羞成怒，遂以行文抄沒本籍財產爲辭，威嚇該報之七股東代表，令即解散報館，七代表獨李海國一人堅決拒之，餘六人畏禍被逼，竟覲顏屈伏，是報遂不免於停版拍賣，且爲康黨間接出資購得，聞者莫不切齒。康黨既據奪是報，乃易名商務報，延張石朋，李牙聰二人爲主筆，石朋筆名頑石，牙聰綽號野子，皆保皇黨會員也。同盟會以報被據奪，遂開全體大會籌募復興資本，一夜得資一萬三千餘盾。是冬十一月初一日乃有第二之光華報繼起，地址在五十尺路二號，先後任經理者，有陳仲赫，黃永田，陳漢平等，主筆政者仍爲居正，呂志伊二人。是報復活，仍與商務報大開筆戰，未及數月，商務報記者張石朋知邪不勝正，自願皈依革命真理，毅然說離該報，李牙聰遂亦緘口無聲。時人戲撰一聯曰：「生公（居正筆名）說法，頑石點頭，天民作威，野子投地」即指此事。無何，商務報以寡助歇業，光華報勢力爲之益張。庚戌（民國前二年）夏康黨勾結清領事謀傾陷光華報以洩憤，由蕭永熙電請外部，勸以危辭，清外部遂向英公使交涉，誣陷光華報鼓吹無政府主義，請將該報當事人驅逐離緬，英使以告緬甸總督，總督遂下令驅居正陳漢平二人出境，其驅令有「押送廣東交清官辦理」字樣，舟過新加坡時，幸該埠同盟會得訊，預延律師向新加坡當局依法抗爭，因得改爲自由出境，亦云險矣。光華報受此種摧殘，同時復有封報捕人之誣，報中職員人人自危，銀安首避去檳榔嶼，餘人亦多隱匿別埠，因之不得已第二次停刊，銀安抵檳後，即與該埠同志陳新政等重組光華報，以繼承仰光之統緒，然仰光光華報僅停刊月餘，呂志伊，

詳其用，陳鍾靈，李海國，魏聲猷，陳震川，丘思道諸人，即已着手復興第三次之機關報，改光華曰進化，即以舊光華報資產充之。於庚戌春二月出版，陳鍾靈為經理，呂志伊任筆政如故，進化報出版八月，康黨復賄買地方警察藉假查賬為名，向該報任意摧殘，終以公理不勝暴力，迫而停刊，志伊以是離緬歸國。事後徐贊劇乃聯絡張永福，楊子貞，會上苑諸人，以學務總會名義承買進化報機器鉛字，另創辦全緬公報，仍以倡導革命為務，至民國成立，仍屹立弗衰。統計同盟會員前後在緬經營黨報多次，約耗六萬餘盾云。

南洋荷屬同盟會

新加坡同盟會成立後，同盟會本部於丙午丁未兩年迭派謝良牧，李柱中，李天麟，陳方度，曾連慶，梁墨奄諸人赴荷屬各埠組織分會，因避荷官干涉，多稱書報社或某某學堂，以掩耳目。各地主持黨務者，泗水有劉亞泗，巴城有梁墨奄，李天麟，八打威甲太有許金璋，文島檳港有溫慶武，李柱中，曾連慶，雙溪烈有黃慶元，勿里洋有伍運忠，勿里洞嗎吃埠有歐陽福成，武陵埠徐雲興，流石埠有藍瑞元，日裡棉蘭有梁瑞祥，歐水應，李增輝，坤甸有沈復權，三寶壟有李載霖。至於各學堂及書報社之設立，遠在壬寅癸卯（民國前九年）至十年年間，某學校會向日本早稻田大學求介紹教員，早稻田大學以董鴻梓荐，其後董復介紹王嘉渠，王文慶，沈鈞業，魏蘭諸人分赴各埠設教，董、王、沈、魏等皆留日學界之革命前輩也。及乙巳丙午間（民國前七八年）新加坡中興公司主人張誠忠受荷屬文島各埠華僑之托，欲聘用教員多人，張商諸陳楚楠，陳為介紹于香港馮自由，於是馮乃分函東京漢口安慶廣州各機關，請推荐同志赴海外為教員，先後應聘者有易本義，張繼，李柱中，時功璧，田桐，陳方度等二十餘人，由是革命學說遂沛然灌輸於學生及其家長，多在校內附設書報社，即以學校之名稱名之，

而書報社遂成革命機關之變相焉。荷屬各埠此類書報社陸續成立者五十餘處，其中最著名者，有蘇門答臘亞齊埠書報社，坤甸圖存書報社，泗水書報社，三寶壟樂羣書報社，老巴剎書報社，野橫埠書報社，巴城書報社，日裏棉蘭華崇書報社，日裏民裏中華書報社，文島檳港中華書報社，文島雙溪烈啓智書報社等等，皆與該地同盟會具有直接關係者也。又各埠黨員開設之報館，泗水有泗濱日報及民鐸報，日裏棉蘭有蘇門答臘報。田桐曾任泗濱日報主筆，因著「南國篇」涉及荷屬政治，竟爲瓜哇政府勒令出境，張繼曾編譯昔年荷屬華僑抵抗荷人之革命史，寄託香港中國日報，尤難能可貴，惜無存稿，丁未戊申間（民國前四五年），陶成章遍遊荷屬羣島，大倡光復會，用江浙皖贛閩五省革命軍名義募款，不受同盟會本部節制，李柱中，曾運慶，王文慶，許雪秋，陳芸生等助之，泗水富商蔣報和蔣報禮兄弟亦入其會，故勢力頗盛，駸駸有取同盟會而代之之勢。戊申河口革命軍起事，汪兆銘，鄧子瑜率總理命往荷屬籌餉，至文島時，大受光復會會員反對，無功而還。庚戌（民國前二年）冬黃克強至南洋籌募廣州起義軍資，力勸李柱中，陳方度等捐除意見，合力籌款，陳李等從之，且願赴粵參加義舉，是役曾派謝良牧，黃甲元，古亮初，伍運忠，梁紐若，劉芷芬，曾伯諤，姚雨平，吳偉康，溫慶武等分頭募集軍餉。結果於辛亥三月廣州一役以前得款三萬餘元，而同盟會已散渙之勢爲之一振。

香港時事畫報

時事畫報原在廣州出版，發刊于乙巳年，爲粵省名畫家潘達微，高劍父等創辦。圖畫以外，附載時事論評及諧談小說等類，由陳垣，岑學侶，謝英伯等擔任，以幽默之措辭，鼓動民族思想，頗能刺激人心，誘導社會。出世未久，風行一時，旋以資金缺乏停刊。己酉年秋間，謝英伯，潘達微，何劍士，鄧佩泉等得林直勉之資助，重組是報於香港，仍用石版印刷，以在香港，言論較粵省自由，所載

裁判圖畫及時評論者，均爲抨擊清政官導革命之作，惜刊至十餘期而止。

美國同盟會

在己酉（民國前三年）冬季以前，美洲各地尙無同盟會之組織。甲辰年（民國前八年）春總理管周遊美國東南西諸埠，聯絡洪門會友，但以其時華僑風氣尙極閉塞，保皇會機關林立各處，雖奔走經年，僅能改組舊金山之大同日報爲革命宣傳樞紐，一新全美華僑之耳目而已。乙巳（民國前七年）同盟會成立後數年，東京本部，屢欲遣派專員赴美開設分會，以限于美國移民律，不易領取入境護照而止。丁未（民國前五年）冬生長美國之香港同盟會員李是男因事返美西舊金山，馮自由授以收攬同志之委任證書，使在美擴張黨勢，李在美數載，以環境惡劣，未便進行。至己酉夏秋間，始聯絡有志者溫雄飛，黃芸蘇，黃傑廷，黃伯耀，許炯藜數人發起少年學社，爲進行之預備。暫以黃伯耀所設永生殯儀館爲通信處。又同年有美東紐約埠華僑署名袁崖狂士者，向香港中國日報投函定報章，馮自由復書，謂既名袁崖，必是熱心革命排滿，請以真姓名見告，以便介紹入黨。此人自稱名趙公璧，極願加入革命黨，馮乃爲作介紹函，使於總理抵美時持之往見。以上所述李是男趙公璧二人，即後來開設美西美東同盟會之主動者也。

己酉春總理以歷年經營粵桂滇三省軍事相繼失敗，南洋同志籌餉之力漸告枯竭，遂決計還遊歐美，另闢財源，以謀再舉。是歲四月自南洋渡歐洲，九月抄由歐抵紐約，時有洪門老友黃溪記親至碼頭接待，黃號佩泉，有商店在巴也街七十二號，其店即以溪記名之。時趙公璧持馮自由介函請謁，并介紹同志陳永惠等數人。即日成立美東同盟會，第一次加盟者有黃溪記趙公璧鍾性初陳永惠吳朝賢唐麟經吳贊等七人，數日後忽接黃克強，胡漢民，馮自由等自香港來電，稱廣州新軍經已運動成熟，有

港幣二萬元即可發動，煩速接濟等語。總理得電，立覆電黃等，謂兩月內決可電匯二萬元，令即進行，并囑各黨員，設法籌措。時分會甫告成立，能力有限，連致公黨書記雷月池，伍洪賞所募之款，僅匯香港中國報第一次香港銀三千元而已，總理乃就近往波士頓埠謁致公黨大佬（主事人）梅宗炯求助，梅素熱心革命，即向各會友募得港幣二千元，亦電匯香港中國報收。十月初八日總理由紐約赴美中芝加哥城，時有耶教牧師蕭丹滋及其子漢衛，夙具革命思想，聞總理之來，預約同志多人恭迎於車站，並開歡迎宴會於聚英樓，總理即席演說革命真理及其趨勢，聽者莫不傾心，同時提議設同盟分會，第一次加盟者，有蕭丹滋，蕭漢衛，梅培，曹陽三，羅泮輝，程天斗，梅喬林，李雄，梅天宇，梅賜璧，梅友輝，梅彬等十餘人，譁贊，伍頌唐，何寶衡，梅濤，林光漢等數十人繼之，即以梅濤所設之泰和店為通信處，總理更向諸會員募款應廣州之急，居芝城月餘，得捐款港幣三千元，即匯香港中國報轉陳同收，陳同即胡漢民之假名也。總理以三處所得總數僅港幣八千元，去二萬之數尙遠，遂于十二月三日首途赴美西繼續募捐，又是地致公黨總董梅宗周，兼任保皇會會長，故致公黨人士獨無所助。

總理前讀美國軍事學家堪馬利所著『美日未來太平洋戰爭論』而善之，嘗與堪氏通信數次，故於此次于役美西途中。在洛杉磯下車，訪堪馬利於其村居，暢談一日，始向舊金山進發。是月二十八日下午車到，李是男率少年學社同志數人歡迎于車站，下車後在唐人埠之克里街粵東旅館下榻。時少年學社祇有社員十餘人，全屬僑校教員或工界分子。總理語以承須籌餉接濟廣州新軍事，僉以有心無力對，總理乃親訪洪門致公黨大佬黃三德及大同日報社長唐瓊昌求助，致公黨於甲辰（民國前八年）春總理登陸美境時，曾出大力援助出險，惟對於國內起兵反清諸役向無供應情事，祇有美國南部巴士杰埠一小致公堂嘗於戊申年（民國前四年）春捐助革命軍資港幣八百元匯寄香港中國報而已。黃三德等聞總理報告軍事後，即向堂內各值理籌商，咸謂募餉事大，非短期內所能解決，正商談間，而

廣州新軍倉卒舉事失敗，餉典戰死之港電傳至。總理及諸同志聞之，異常悼惜。即由李是男向其父佑寬所設之和隆皮鞋店假借美金數百元，匯香港中國報收港幣一千元，為義師善後之需。統計總理此度遊美四次匯款總數為港幣九千元，皆由中國報代收轉交南方支部，足可見當年募集革命資金之不易矣。

總理鑒於是役籌餉之困難，益覺成立革命團體之必要，遂令李是男改組少年學社為同盟會，正月十八日宣告成立。總理親為主盟人。第一次宣誓入會者，有李是男，黃芬齋，黃伯縉，許炯黎，趙煜，劉漢華，黃傑亭，李旺，劉達朝，黃經申，伍進，鄺輝，李梓青，王華彬，崔通約，胡祖，張謫蘊，楊漢魂等十八人。其後加入者復有黃超五，雷祝三，林朝漢，鄭佐治，盧維溥，黃富，李七，周拔五，鄭占南，陳樹華，司徒介臣，朱卓文，馬錦興，龔顯裔，伍平一，劉鞠可，劉冠辰，廖達生，朱本富，劉廣華，簡振興，歐漢英，梁日東，余森郎，劉日初，鄭超羣，陳燦垣，甄春年，雷蕙泉，黃營三，何利，李伯眉，鄭廣池，劉博文，周文培，梁夢熊，鄭灼，高廷槐，劉殿生，伍惠泉，陳披荆，譚南，朱漢彝，張漢俠等數百人。查總理此次組織美國同盟會最關重要者，為擴大同盟會盟書辭句及改用會名一事，以前為「驅除鞑虜恢復中華創立民國平均地權」之十六字，今乃易為「廢滅鞑虜清朝創立中華民國實行民生主義」之十八字，又將盟書內中國同盟會會員亦易為中華革命黨黨員，然對外對內，仍用同盟會名義如故，此為總理是次遊美之創舉。東京本部及國內外各地分會均未接到此項通告焉。舊金山同盟會既成立，總理旋於是春三月赴檀香山。自是會務日漸興盛，衆乃集資籌辦黨報，於秋冬間出版，即少年中國晨報是也。冬十一月接總理自南洋來書，謂粵省軍事大略籌備就緒，有十萬元即可發動，請美洲各埠同志担任此數，電匯應急等語。未幾總理應加拿大馮自由之邀，復由南洋渡美，十二月下旬市抵紐約，即兼程赴加拿大雲高華埠策動籌餉，同時更催促美東西各分會從速進行，李是男等奉令後，極力籌措，得港幣一萬元，紐約黨員不多，亦得港幣二千元，均由香港

革命軍統籌部發給收據，是爲辛亥三月廿九廣州大舉義捐之一部。及是役失敗，總理於五月復蒞舊金山，聯合致公黨及同盟會兩團體共組織洪門籌餉局，爲募集義捐之總樞紐，由是兩派合力進行，巨款斯集，大有助于是歲八月武昌革命之發難及中華民國之肇建，厥功懋焉。

檀香山同盟會

同盟會成立後五年，檀香山興中會尙未改組爲同盟會，盧信于丁未（民國前五年）到檀主持黨務，曾兼奉開設同盟分會之使命，以一部同志僑商鑒於往年駐檀清領事數次移文粵督查抄興中會員李昌等及保皇會員梁蔭南等原籍家產之前轍，有所戒懼，故未便大張旗鼓，從事改組。及庚戌三月總理自美抵檀，盧信，會長福，黃亮，梁海，黃菴，雷官進諸人迎迓於碼頭，數日後，諸同志開歡迎大會於荷梯庫街華人戲院，僑衆列席者千餘人，座無餘隙，總理宣佈廣州新軍一役失敗之經過，謂全國軍人多已趨向革命，如軍餉充足，即可隨時大舉，座衆聆言，咸爲鼓舞，旋即召集興中會員開會於自由新報樓上，令改寫盟書，補行同盟會入會典禮，衆無異言，第一次加盟者爲會長福，梁海，雷官進，黃菴，許棠，許直臣，溫雄飛，程就，鄭良，林光，譚遠，古柏荃，盧冠等二十餘人，公推梁海爲會長，會長福爲司庫，盧信爲書記，繼以同志商人中有不便公開入黨者，特另設同盟會祕密團，使不致爲清領事所羅織構陷，復在鍾宇住宅開祕密會，與會者有鍾宇，楊廣達，李烈，譚遠，譚亮，黃亮，雷官進，盧信諸人，衆如式加盟後，由總理委任楊廣達爲團長，李烈爲司庫，盧信爲書記，譚遠，雷官進，黃亮，鍾宇等爲值理。其後茂宜及希墟兩島興中會亦繼續改組爲同盟會，茂宜埠加盟者有鄧明三，陸進，譚進，劉聘，譚貴福等，希墟埠加盟者，有黎協，林弼南，李成功，劉安，李社銀，鄭功，袁僚，譚惠金，古鵬雲，古賀等。總理居檀兩月，旋買舟赴日本，瀕行語會長福等，謂旅檀華僑子弟日衆，應設學校以教育之，故事後長福，盧信，楊廣達，李烈，黃亮，鍾宇，雷官進，譚遠

，楊著昆，古伯荃等，遂聯合埠中股商趙錦，古今福，龍文照，許發，劉佛良，余楫，楊年，林業舉等措資創辦華文學校，其中捐款最巨者，首推長福。是歲五月盧信歸香港，代聘謝英伯為校長，是校續辦多年，成績卓著，即民十七年改名中山學校者是也。辛亥三月二十九廣州一役之前，檀島同盟會亦接總理公函，令募款接濟，以乏專員前往督導，故收效甚微，結果香港革命軍統籌部僅收到該埠捐款港幣三千元，尙不及會長福一人解助華文學校之數，殊出總理意外云。

新加坡星洲晨報

星洲晨報出版於己酉年（民前三年）為同盟會員謝心準，周之貞等所創，是歲香港中國日報記者謝心準因事至南洋，初任中興報編輯，旋與同志周之貞措資發刊此報，其倡導革命抨擊君憲，與中興報相伯仲，且暢銷於英荷兩屬各埠，收效亦巨，惟出世不及一年，即以資本不足，於庚戌年秋冬間停刊，於是職員星散，其司賬員勞培及收賬員周華次年參加廣州黃花崗之役，為國殉難，殊足為南洋華僑生色。

加拿大致公堂及大漢報

北美英屬加拿大全境有洪門致公堂數十處，與美國各埠致公堂南北互相對峙，其總堂設於卑詩省之首府維多利一小島，分堂林立於雲高華，新西院，天仁米，奶磨，雲利辟，沙士加寸，電振打，都朗度，滿地可，魁克北各處，華僑掛名堂籍者殆佔全體人數十之八九，雲高華為太平洋岸之交通孔道，工商業繁盛，來往華僑皆集中於是，因而此地致公堂之勢力亦較大於維多利總堂，洪門之宗旨原為反清復明，以代遠年湮，會員多已忘却本來面目。已亥（民國前十三年）春康有為自日本蒞加拿大，

首設保皇會於維多利及雲高華二埠，致公堂會員林立是等誤入其彀中者，頗不乏人。及甲辰年（民國前八年）舊金山洪門機關之大同日報改組，由馮自由代聘劉成禹爲主筆，日發揮洪門革命排滿之宗旨，美洲各地會員始漸覺悟，至己酉年（民國前三年）冬雲埠致公堂大佬（其主盟人之稱）陳文錫，書記黃璧峯，司庫岑發琛等感於革命潮流之澎湃，遂發起大漢日報爲洪門之喉舌，特移書香港馮自由請介紹主筆，馮於庚戌（民國前二年）正月得書，以其時廣州新軍反正一役收挫未久，民黨元氣大傷，非闢新途徑不足以發展，遂辭退中國社長及同盟分會長一職，逕效毛遂之自荐。庚戌五月抵雲高華，時大漢報已出版半月，由張澤蓀黃希純等担任編輯事務，加拿大向無革命黨人足跡，致公堂以馮爲入關多年之洪門手足（洪門稱加盟爲入關兄弟爲手足）頗能言聽計從，故馮主大漢報筆政數月，而全加會員之思想一新，莫不渴望祖國革命軍之速舉。各地保皇會員因而迷途知返登報脫黨者，絡繹不絕，雲埠保皇會原有機關報名日新報，開設多年，其主筆梁文興，康徒湯覺頓之小舅也，以彼黨勢力日漸衰退，遂向大漢報挑戰洩憤，馮乃揭發歷年康梁棍騙罪狀，向之迎頭痛擊，彼此駁論至二百餘編，爲海外兩黨最持久之文戰，而僑胞智識亦緣是具長足之開發。至是年冬，馮以籌餉大舉之時機已告成熟，乃電告總理請其尅日來加發勸募款，時總理正與黃克強趙燧等規劃廣州大舉，需款至急，得馮電大喜，遂由南洋兼程渡美。

辛亥正月初二晚總理自美東轉向雲高華，洪門人士迎候于車站者數千百人，遂相偕赴致公堂茶會，總理與衆寒暄後，遍問座衆對革命有何疑義，會員起而質疑者數人，經總理解答，衆咸心悅誠服，繼由致公堂假得華人大戲院，逐日由總理演講革命之是非得失利害種種問題，連續演講四日，每日衆逾千人，保皇黨徒及中立各派來聽者亦踵趾相接，馮自由知人心可用，遂在致公堂提議設立洪門籌餉局，從事募捐，以應祖國大舉需要，衆無異議，於是推舉劉焜坤爲籌餉局總理，岑發琛爲司庫，陳榛如爲中文書記，黃希純爲英文書記，黃紀傑爲交際幹事，規模既具，成效漸著，雲埠致公堂

會員多屬勞工，僅憑個人捐助，爲數無多，查各埠致公堂皆置有產業，若能使之變賣助餉，實爲事半功倍。總理深以爲然，願以事屬公產，外客不便進言，僅授意熱心青年從中倡議而已。維多利致公總堂向爲各埠領袖，其向背之態度，足爲各堂表率，某日設宴歡迎總理及馮自由等，席間有某散仔（洪門稱年長而資望深者曰叔父普通會員曰散仔）倡議，謂孫大哥（洪門稱屢次起兵抗滿之首領曰大哥）現在接香港急電，廣東起義在即，急需軍餉，吾等有心協助，緩不濟急，本堂現有樓房可以抵押現款，似宜向銀行商借若干電匯應急等語，各叔父未置可否，次日召集大會研究辦法，總理與馮自由報告起義需餉情形後退席，於是各散仔紛紛提議將公堂樓宇抵押充餉之說，全場一致贊成，即遵總理指示，將抵押所得之款港幣三萬元電匯香港文咸東街金利源藥材行，轉交李海雲收，金利源爲同志僑商李煜堂兄弟之老店，海雲是其族姪，時任革命軍統籌部出納課長。

自維多利致公堂變產赴義後，當地僑商林禮斌，黃宜霖，朱文伯等亦自動匯港幣四千元，他埠致公堂變產者尙有都朗度埠一萬元，滿地可埠四千元，此外捐款兩多繼交雲埠籌餉局轉匯，約萬數千元，總數在港幣七萬元以上，佔辛亥三月二十九日黃花崗一役全球各地籌餉之第一位。總理於維雲二處，捐款匯港後，即沿加拿大太平洋鐵路以達美東紐約，沿途經各大埠，輒下車向致公堂會員募款，所到輒受歡迎，成績之良，遠非美國致公堂所能企及，殊出總理意外。

加拿大同盟會

加拿大向稱保皇會之發源地，康梁師徒頗有操縱僑衆之勢，及戊申己酉間（民國前三四年）徐勤因與同黨劉士驥爭奪廣西天平山礦產，遂派何其武刺殺劉於廣州，爲粵政府通緝，劉士驥一派大動公憤，雲高華保皇會會長葉恩兄弟爲天平山礦公司大股東，與劉交厚，因是憤然脫黨，加屬各埠從之者

各黨爭奪或明或暗，結果當選者爲同盟會員劉儒坤，楊芳，周連盛，苗子錫，葉求茂，司徒錫等十二人，致公堂黃紀傑，許昌平，李起辰等四人，中立派周天霖等三人，保皇會員孫振邦一人，孫雖屬保皇會籍，以其與總理同邑同族，且於總理蒞此時，曾召集邑人設宴歡迎，故舉之。是時雲瑛同盟會員尙不滿百人，竟能操縱萬人之選舉權，誠爲海外各地華僑歷史之創例。

是歲五月總理在舊金山令同盟會員一律加入洪門會籍，與該地致公堂聯合組織洪門籌餉局，以應國內革命軍需要，恐留美同盟會員仍與洪門人士有所隔閡，特電馮自由赴美相助，馮遂於七月下旬離加拿大，同盟會長一職，衆舉黃希純承之。不及一月，武昌革命軍起，會務日益發展，華僑繼續入會者有會石泉，周子駿，曾兆，鍾暖，曾魁漢，馬少漢，鄭堂，李天民，李佛池，侯民一，許一鶚，黃炳基，崔景，李血生，黃發文，黃熙賢，李鐵血，趙衛平，鍾健峯，鄭佐治（與舊金山之鄭佐治同名異人），何夢齡，李慈五等數百人，各埠分會亦相繼成立，實則馮自由離加時，會員僅約二百人而已。

香港金利源藥材行

辛亥三月二十九日廣州一役前後，海外各地所匯義捐均寄香港文咸東街金利源藥材行轉交革命軍統籌部出納課長李海雲收，金利源爲開設四十餘年之老商行，專營運土產藥材至美國舊金山，信用雄厚，爲香港藥材業之第一家，屬巨商李煜堂文啓兄弟所設。丙午（民國前六年）年秋，中國日報受文裕堂公司破產之影響，漸於被保皇黨篡奪之危機，馮自由乃求助於外舅李煜堂，煜堂慨然措資，預向文裕堂承購中國報全部資產，而中國報賴以繼續出版，是爲煜堂與革命黨發生關係之開始，煜堂尙有一直接管理之商店曰永利源號，亦以經營參茸爲業，丙午後中國報如遇有資金匱乏情事，恒由永利源號協助之。及庚戌（民國前二年）冬，永利源號歇業，煜堂之弟文啓及附設於金利源之遠同源外匯莊經理李

海雲亦加盟於同盟會，海雲且被推為革命軍統籌部出納課長，遂通知外洋各機關一律匯款於金利源，以免為港吏所注意。蓋在庚戌夏，馮自由離港以前，各處匯款均寄中國報，馮涉美洲後，乃將匯款地點改為金利源，以資便利。辛亥夏秋間美洲洪門籌餉局成立，所匯金利源之義款為數不貲，是年秋冬間，總理當選中華民國臨時大總統，其所備赴南京就職賞犒軍士之三十餘萬元，即為存貯金利源之義捐餘款，時李海雲已任粵省官銀錢局局長，義捐餘款係由陳元英代理保管。又庚戌辛亥二年往來黨員恒假金利源倉庫密藏武器及炸彈，店夥以為危險，深滋疑懼，煜堂兄弟絕不措意，誠為一般老商號之錚錚者，此店至今仍屹然存在，文啓年逾七十，港人今尚不知彼為老革命黨也。

舊金山少年中國晨報

丁未年新寧縣人李是男以族人李伯海之介紹，在香港加入同盟會，是男原生長美國，是秋買掉返美，馮自由授以委任證書，使在美收攬黨員，是男以華僑多數頑固，遲遲不敢著手。至己酉年（民國前三年）始與同志溫雄飛，黃芸蘇，黃伯耀許炯藜數人發起少年學社為革命志士之小結合。數月後得社員十餘人，遂利用華僑土生子出版刊物之機會，印刷一種週刊，名曰「美洲少年」，由是男與雄飛芸蘇數人担任著述小品文字，頗多批評清政及宣導革命之作，附以粵曲歌謠，均出是男手筆，大為讀者稱賞。及總理於是歲十二月杪抵舊金山，是男等奉命將少年學社改組為同盟會，自是會務日盛，遍分會於各埠，乃更募集資金，將少年週刊擴大大為少年中國晨報，籌備數月，於是秋在唐人埠克利街出版，是為美洲同盟會機關報之第一家，在美各華文報紙通例在每日正午發刊，獨少年報于每晨即就派送，亦為各報之創例。初期任經理者為陳樹華，司徒介臣二人，任撰述論文者為黃超五，黃芸蘇，崔通約張謐蘊諸人，任翻譯者為黃伯耀一人，是男則專任副刊編輯，出世後，高談革命排滿，風行一時，諸記者中有崔通約者，原屬康有為弟子，亦耶蘇教徒，曾任香港世界公益報編輯，性情反覆，到處為

人招棄。辛亥五月以向總理索資不得，竟假借少年報登載刺詩詞，有一生平不喜因人熱，恥向黨魁請捧場領袖何時生我土，國亡種滅倍心傷」之句，各會員讀之大嘩，遂由同盟會公議逐之於門外，同盟會對於犯罪黨員，重者判死刑，並無擯逐之例，有之自崔通約始。少年報於民國成立後，報務蒸蒸日上，是男久任是報編輯多載，至民十始奉總理命回國。少年報以營業日隆，獲利甚豐，置有大廈一所，及今猶巍然矗立，為清季革命黨機關報之惟一壽命最長者。

菲律濱同盟會及公理報

菲律濱華僑與革命黨發生關係頗早，徒以美屬入境禁例森嚴，吾國人來往不易，因而革命黨不便派人前往發展黨務。延至辛亥年始有同盟會員之足跡，甲辰乙巳間（民國前七八年）。其首府馬尼刺僑商漸傾心革命，香港中國報及世界公益報在該處各銷售數十份，有閩籍西醫鄭漢洪者，香港雅麗士醫院畢業生，曾與總理同視，素主張民族主義，為旅菲閩僑之巨擘，又有閩商楊匯溪之子豪侶，自幼生長廣東，曾留學日本早稻田大學，與馮自由交誼最密，二人均時向僑衆抨擊清政，不遺餘力，閩粵同胞多為感化，尤以歐陽鴻鈞，何寶衡陳達三，林日安等數人為激烈。丙午年（民國前六年）保皇黨徐勤假座該處廣東會館演說立憲，欲乘機開設帝國憲政會，楊豪侶歐陽鴻鈞，何寶衡等曾聚衆破壞其事，徐勤幾為歐極，卒無所成。辛亥春陽江人李其奉派自香港至馬尼刺，訪鄭漢洪議開同盟分會，漢洪遂號召同志即日成立團體，受盟者有鄭漢洪，黃三記，王忠誠，黃漢傑，鄧寶廷，林日安，吳宗明，楊匯溪諸人，旋發刊公理日報，以漢洪為經理，吳宗明為編輯，是為旅菲華僑設報之嚆矢。

澳洲全境以華僑入境禁例之拘束，向無革命黨人足跡，辛丑年（民國前十一年）梁啓超雖親遊其地，設立保皇會於雪梨，金山及墨爾本，紐絲倫各埠，其時著名僑商殆無不列籍保皇會者，其言論機關曰東華新報，由梁啓超荐唐才常之弟才質主任筆政。丁未徐勤主使何其武暗殺同黨劉士驥事起，保皇會因是分裂。旅澳華僑漸知康梁斂財之真相，多登報脫黨，如上海永安百貨公司總經理郭標即其一也。丙午年墨爾本華僑之有志者，創設警東新報於羅素爾街一百八十九號，始提倡革命。庚戌年雪梨埠致公堂更有民國報之發刊，致公堂為洪門三合會所組織，其宗旨曰反清復明，故民國報亦以民族主義相號召。其後民國三年由澳至美久任少年報記者之劉濂查，民六年赴北京充任華僑參議員選舉代表之伍洪培，民十三年列席廣州國民黨改組大會代表之黃右公，皆出身於雪梨民國報者也。辛亥三月二十九日廣州一役，雪梨及墨爾本兩埠同志捐資數百鎊助餉，均寄雲高華大漢報馮自由代收。此外紐絲倫威靈頓埠華僑，呂傑，朱楷，黃國民等，亦熱心革命，呂傑於戊申年曾致書香港馮自由求入革命黨，馮許其自動填寫盟書郵寄香港，同盟會定例，須主盟人或代理主盟人在場，始許加盟，呂傑郵遞盟書，實為創舉。

香港支那暗殺團

庚戌正月廣州新軍一役失敗後，諸同志紛紛避地香港，是歲夏間劉思復，謝英伯，陳自覺，朱述堂，李熙斌數人擬組織暗殺團，實行誅戮滿清大吏以補助革命工作之進行，由思復起草章程，遴選極能負責而作事慎密之同志為團員，發起人只有劉思復，謝英伯，陳自覺，朱述堂，高劍父，程克，陳炯明，李熙斌等八人，其初租定般威道一樓為機關，定名曰支那暗殺團，繼為製造爆裂品起見，更在油麻地再闢一樓，由徐宗漢，李應生二人居之，隨後陸續介紹入團者，有宋銘黃（女），丁湘田（女）

林冠慈，施正甫，張清潭，陳敬岳，周演明，馬育航，何報鴻，李少華，梁倚神，鄭岸父，張倫，張佐基，潘賦西，劉鏡源諸人，所製炸藥炸彈均攜往同志鄧蔭南之屯門農場分別試驗，威力強猛，可供實用。六月團部由般咸道遷摩士忌街二十三號，衆議前次汪兆銘，黃復生等謀炸清攝政王載灃不成，本團應派員北上完成此項工作，公推劉思復，朱述堂，李熙斌，程克四人赴北京執行載灃死刑，一面由熙斌返廣州變產籌款，供北上經費，程克自告奮勇，願先首途籌備一切。程河南人，留日學生，已酉冬因刺殺清政府密探，亡命至香港，蟄伏多時，衆信之不疑，給與旅資及炸藥十磅，使抵北京後即傳報消息，以便各團員繼續出發，詎程於九月首途後，杳無消息，數托燕滬同志調查，均無迹象可尋，衆大疑慮，北上之行，因之擱淺。

辛亥三月廿九日廣州一役之前，團員知大舉在即，不便進行特殊工作，致影響全局，故暫停動作。及是役失敗，衆遂決議執行粵督張鳴岐，水師提督李準二人之死刑，先後推定林冠慈，陳敬岳，潘賦西，劉鏡源四人爲執行員，朱述堂，李熙斌，高劍父，李少華，梁倚神，馬育航，周演明，張倫，施正甫，張清潭，張佐基，何報鴻等爲輔助員，分途進行，炸彈中一部由馬育航，周演明，張倫等認密運至廣州，時張鳴岐深居簡出，不易下手，衆乃集其目標於李準一人。至閏六月十九日，衆偵知李準必外出，林冠慈，陳敬岳，潘賦西，各分路截擊，劉鏡源稍遲，未加入，李準至雙門底，林連舉四炸彈向其坐轎擲之，轎毀，李傷仆地上，斷脅骨二，衛士死傷者二十餘人，林亦中數鎗殉義。陳敬岳入大南門，聞爆炸聲，知別執行員已下手，乃轉入育賢街，以失路爲警察所疑，被捕，越日經清吏審訊，直認不諱，卒被殺害。潘賦西以攝影鏡箱內藏兩炸彈，未遭人疑，運至天字碼頭，僱小艇渡河，作失手狀，投鏡箱於水，得以無事。是役喪失林陳二同志，而李準重傷未死，不久醫愈，似屬得不償失，然是歲九月廣東之光復，以李準先期通款投誠，乃得不流血而收美果，不可謂非林冠慈一炸之力也。是歲八月武昌革命軍起，團部探悉新任清將軍鳳山定期自滬來粵，遂派朱述堂，李熙斌，梁倚

神等至廣州謀轟炸之，以促進各路義軍之發難，適黃克強亦派李應生，周之楨，李沛基等自港來粵，扣同一之目的，團部以宗旨相同，有互助之責，由梁倚神助其租定房屋，以便行事，即倉前街某屋是也，九月四日鳳山抵廣州，同志已於期前定計分途轟炸之，團部派出趙灼文，張樹二人為執行員，預定在路上擲彈邀擊，李沛基則在倉前街機關守候，謀於鳳山大隊經過時，即以窗前所牽之大炸彈放下，同時自屋後避去，是晨得朱述堂來報鳳山入城確期，乃急準備一切，午前八時，鳳山果輕裝減從以過倉前街，沛基依計行事，彈落立爆，鳳山與其衛隊多人均炸斃，舖屋倒塌者六七家，關於李沛基轟炸鳳山事，詳見他項紀載，茲不贅述，時趙灼文等亦在別路守候截擊，聞爆炸聲，知已有人動手，遂返河南機關報告經過，粵省既光復，李熙斌應北伐軍總司令姚雨平之招，主持炸彈營事務，劉思復，丁湘田，鄭岸父等亦赴滬，擬北上轟炸滿清諸樞要，以剪除革命軍之障礙，已而南北和議告成，全國統一，暗殺團於是宣布解散。

秘魯國利馬埠民醒報

南美洲各國向無革命黨人足跡，諸國華僑人數，以僑寓秘魯國利馬埠者為最衆，庚戌辛亥間，該處華僑青年李碩夫，許繩香數人集資創設民醒報，以開通民智宜導革命為宗旨，是為南美洲革命黨報之第一家，附近各國如智利，危地馬拉，哥斯達黎加，巴西，巴拿馬等處華僑均受其感化，辛亥八月革命以前，秘魯智利二國捐餉匯寄香港中國日報代收者，為數不貲，因與祖國相隔太遠，故該處同盟會之成立係在民國以後云。

新加坡南僑日報

新加坡自中興日報，星洲晨報相繼停刊後，同盟會務最為不振，革命黨之啞舌緘默者將及一年。

及辛亥三月廣州之役失敗，再消僑胞之思想，異常悲憤，當地同盟會員益覺缺乏言論機關之失當，時陳楚楠，張永福二人均以商業失敗，無心黨務，遂有盧耀堂黃吉辰等承頂星洲晨報之機器鉛字以重組南僑日報，以爲中興日報之繼，出版後大受英荷兩屬人士之歡迎，發刊數月，適遇武昌革命軍起，各省陸續響應，僑衆多根據此報所傳達之消息爲趨向云。

美洲洪門籌餉局

辛亥三月廿九廣州之役失敗後兩月，孫總理重遊舊金山，欲向洪門人士及同盟會員募集巨款，爲捲土重來之計，時致公堂人數雖衆，而渙散不振，頗遭有志青年所輕視，同盟會員則思想新穎而力量不足，致公堂分子皆以革命前輩自命，恥與青年爲伍，雙方各走極端，殊難合作，庚戌正月廣州新軍之役及辛亥三月黃花崗之役，舊金山致公堂坐視義舉，未立寸功，良由於此。是歲五月總理自美東蒞臨，有鑒於兩團體不能合作之弊，乃與致公堂大德黃三德大同報司理唐瓊昌商議合作方法，擬令同盟會員一律加入洪門黨籍，而致公堂則開特別會，刪除繁文褥禮，以優遇同盟會員入關，庶可共同革命救國，黃唐等皆熱心贊成，遂由雙方各在大同日報及少年中國晨報揭登聯合布告，旋由總理提議組織洪門籌餉局，以策動祖國革命軍事，並手訂緣起章程及約章若干款，錄之如左：

洪門籌餉局緣起

茲當人心思漢，天意亡胡，所以各省義師連年繼起，然尙未能一戰成功者，何也，豈以人才之不足，戰陣之無勇耶，皆不然也。試觀最近廣州一役，捨身赴義者，其人多文武兼長之士，出類拔萃之才，當其謀洩失敗，猶能以數十人力戰而破督署，出重圍，以一當百，使敵喪胆可知也。然人才既如

彼，英勇又如此，仍不免於失敗者，其故安在，實財力不足布置未周之故也。內地同胞久在苛政之下，橫徵暴斂，剝皮及骨，遂至民窮財盡，固無從厚集資財而為萬全之布置也，故輸財助餉，以補內地同胞之所不逮，實為我海外華僑之責任，義不能辭也。內地同胞捨命，海外同胞出財，各盡所長，互相為用，則革命大業之成，可指日而定也。我洪門創設於美洲已數十年矣，本為合大眾，集大力，以待時機而圖光復也，所謂反清復明者，此也，今時機已至，風雲亦急，失此不圖，則瓜分之禍立見矣。本總掌茲承孫大哥指示，設立籌餉局于金山大埠，妥訂章程，務期完善無弊以收效果，捐冊寄到之日，切望各埠手足竭力向前，踴躍捐資，以助成革命大業，則洪門幸甚，中國幸甚。

謹擬章程開列如左

一 革命軍之宗旨，為廢滅鞏固清朝，創立中華民國，實行民生主義，使我同胞共享自由平等博愛之幸福。

二 凡我華人皆應供財出力，以助中華革命大業之速成。

三 凡事前曾捐助軍餉至少十元（美金）者，皆得列名為優先國民，他日革命成功，概免軍政府條件之約束，而入國籍。

四 凡事前未曾捐過軍餉之人，他日革命成功，須照軍政府之約束而入國籍。

五 凡捐過軍餉五元（美金）以上者，當照革命軍籌餉約章獎勵條件辦理。

六 議在金山大埠致公總堂設立一籌餉局，由衆公舉人員辦理，由孫大哥委人監督，各埠曾捐助軍餉者，皆可派一查數員，隨時到來查數。

七 籌餉局分為兩部，一董事部，一辦事部。

董事部以現任致公堂職員及捐款千元以上者當之，人員無定額。

辦事部設總辦一人，會計一人，查數二人，中文書記三人，西文書記一人，勸募委員無定額。

隨時由董事議定，由總辦擇人任使，監督一人。

八 凡局內之事必經董事部議決，然後辦事部方能執行。

九 所收捐款多少，除經費外，一概存入銀行，以備孫大哥有事隨時調用，他事不得提支。

十 議所收款撥出一成爲籌餉局經費，以支辦事人員車費薪水郵電紙筆各費，如有盈餘，仍撥歸軍餉之用。

十一 所有籌餉局經費，須要監督批准方能動支。

十二 所發捐冊，以寄到之日起，限期兩個月繳回清算，按名給發執照爲憑，其指數五元以上者，另行雙倍給發中華民國金幣票收執。

美洲金山大埠致公總堂特啓

附錄革命籌餉約章

第一款 凡認任軍餉至美金五元以上者，發回中華民國金幣票雙倍之數收執，民國成立之日作民

國國寶通用，交納稅課，兌換實銀。

第二款 認任軍餉至百元以上者，除照第一款辦法之外，另行每百元記功一次，每千元記大功一次，民國成立之日，照爲國立功之例，與軍士一體論功行賞。

第三款 凡得記大功者，於民國成立之日，可向民國政府請領一切實業優先利權。

第四款 以上約章祇行於革命軍未起事之前，至革命軍起事之後，所有報効軍餉者，須照因糧局章程辦理。

中華革命軍發起人孫文立

洪門籌餉局既成立，因對外關係，定名國民救濟局，局中職員均由致公堂及同盟會二團體選用之，辦事處設於舊金山士波福街三十八號致公堂二樓，辛亥七月二十九日 總理及全體職員管齊集拍照，以誌紀念，茲將洪門籌餉局職員姓名黨系表列如下。

總辦朱三進(致公) 羅敦怡(致公) 監督黃三德(致公) 會計李是男(同盟) 核數司徒文晃(致公)
李務明(致公) 司數黃傑廷(同盟) 中文書記劉鞠可(同盟) 關輯卿(致公) 黃任賢(致公) 西
文書記唐瓊昌(致公) 黃伯耀(同盟)

董事黃達仁(致公) 朱逸庭(致公) 李壽(致公) 黎利生(致公) 區秀山(致公) 劉達朝(同盟)
林朝漢(同盟) 伍平一(同盟) 林元(致公) 黃世韶(致公) 許炯葵(同盟) 梁澤霖(致公) 伍
實(致公) 陸天培(致公) 李洪宇(致公) 劉冠辰(同盟) 黃佩蘭(致公) 鄭文迎(致公) 劉學
澤(致公) 廖達生(同盟) 陳觀光(致公) 曾進德(致公) 江總(致公) 伍梓楠(致公) 梁日東
(同盟) 余森郎(同盟) 劉日初(同盟) 馮乾初(致公) 鄭超羣(同盟)
演說員黃芸蘇(同盟) 張靄蘊(同盟) 趙煜(同盟)

六月二十六日籌餉局議決推舉 總理及黃芸蘇張靄蘊趙煜四人赴美國南北各埠演說籌餉，定期七月初二日分途出發，總理漸行，慮同盟會與致公堂中人仍多隔閡，不能合作，以馮自由久入洪門與黃三德唐瓊昌等素有舊誼，特電雲高華大漢日報，令赴美相助，馮得電，遂於七月下旬首途趨舊金山，抵美不及二十日，而武昌革命軍起，乃與芝加哥同志梅培共提議撥款購飛機運回祖國充厚革命軍勢力事，籌餉局各董事咸予贊同，立委梅培在美中担任購機及延聘美國飛機師等事。是即余燮，李綺菴二人借美機師威爾霍斯於民元年正月攜帶回國之寇締士廠製飛機六部是也。九月杪致公堂及同盟會洪門籌餉局三團體召集聯合會，以革命軍已光復多省，民國政府不日成立，特公推馮自由為旅美華僑革命黨總代表，回國參與組織臨時政府事宜，並將籌餉局所發行已傳未傳之金幣券一切賬目攜歸繼早革命政府銷號。及民元南京政府成立，籌餉局以大功告成，遂宣告解散，局中職員之屬同盟會籍者強半

返國服務，南北統一後以官費留學由稽勸局派送至美者，有黃芸蘇，張詠蘊，趙煜，劉鞠可，余森郎五人。

南洋及美洲革命黨之歸國參政代表

民元中華民國臨時政府宣布成立之前，海外華僑革命黨特派回國參與組織中央共和政府之代表二人，一爲南洋同盟會總代表吳世榮，一爲美洲致公堂及同盟會洪門籌餉局三團體之總代表馮自由，均於辛亥十一月初旬歸抵上海，同向代大元帥黃興及滬軍都督陳其美報到，是月六日孫總理由歐洲抵滬，馮吳二人往謁，即由總理及黃興陳其美先後電告各省代表聯合會，以歸國之海外革命黨代表將參加組織臨時政府事。初十日各省代表在南京開臨時大總統正式選舉會，馮吳二人同往報到，代表會主席謂據臨時政府組織大綱，並無海外華僑參加選舉之規定，故歸國代表祇可就旁聽席等語，因此此二海外代表是日僅能觀光臨時大總統誕生之盛典而已。南北統一後，粵省臨時參議員盧信在參議院提議華僑應享有參政權案，國民黨各議員和之，結果議決參議院有華僑參議員名額六名，由海外各地中華總商會中華會館書報社之三種團體代表在中央政府所在地選舉之，此項選舉法於元年八月公佈。未幾吳世榮組織華僑聯合會於上海泗涇路，衆舉世榮爲會長，吳應培副之。民二年春海外各埠華僑團體代表歸國參加北京選舉會者一百八十餘人，衆發起全國華僑聯合會，假李鐵拐斜街肇慶會館開會，選舉馮自由爲會長，時國民黨本部亦委託馮以招待華僑同志任務，及選舉揭曉，當選參議員者爲唐瓊昌，吳湘，朱兆莘，謝良牧，蔣報和盧信六人。民五冬國會恢復，參議院議員依法改選三分之一。民六夏各埠華僑團體代表歸國參加選舉者七百餘人，中以國民黨所屬書報社代表佔大多數，是爲華僑代表有史以來之空前盛會。選舉第一日，當選者爲日本長崎中華總商會代表馮自由，第二日當選者爲美國舊金山國民書報社代表黃伯耀，事後均接總理自滬來電勉勵有加，選舉會開後一月，參衆兩院以督軍團威脅，遂被非法解散，由是流離粵省者五載，至民十一年八月國會二度恢復，馮黃二人始赴北京就參議員職。

中華民國三十四年四月初版

海外叢書

華僑革命史話 上冊

本書白報紙本定價國幣 元印幣叁角

版權所有
不准翻印

著者 馮自由
發行者 海外出版社

總社 重慶九道門

印度分社 加爾各答中央路五十二號B

52B CHITTARANJAN

AVENUE, CALCUTTA, INDIA.